

ACCION 21 
PLAN DI
PARTIDO
2025 - 2029

#BanBibaMiho
WWW.ACCION21.COM

CONTENIDO

MINISTERIO DI BIENESTAR HUMANO	6
ENSEÑANSA	7
Enseñansa 2050	7
Conecta	7
Transforma	8
Empodera	8
E siñado	9
Structura di cuidado	11
E maestro	11
MINISTER DI BIENESTAR HUMANO Y DEPARTAMENTO DI ENSEÑANSA	12
Departamento di Enseñansa	12
Dienst Inspectie van het Onderwijs	13
Bureau Leerplicht	13
Directiva escolar	13
Infraestructura, proceso y sistema	14
EPB y EPI (proyectonan di inclusion)	14
Conscientisacion - pa tur scol	15
Enseñansa continuo	15
Enseñansa y otro tereno di desaroyo	16
Financiamiento di enseñansa	16
Metodonan pa futuro	16
SALUBRIDAD	18
Cuido preventivo	18
Fortifica AZV y DVG	18
Gastonan di AZV	19
Salud mental	20
Adicción	20

Eutanasia	20
Permiti remedinan alternativo	21
Derecho di muhe pa scoge	21
Introduci un 'Patient Bill of Rights'	22
Introduci un 'Patiëntenraad'	22
Acredita mediconan	22
Cuido pa nos adultonan mayor	22
Reduci premie di AZV pa pensionadonan	23
Cuido cronico	23
IMSAN	23
Innovacion	24
Mas fondo pa salubridad y cuidado cronico	24
ASUNTO SOCIAL	24
Declara asunto social un emergencia nacional	25
Centro di barionan	25
Introduci un database social	26
Mamanan hoben - Tiener moeders	26
Personanan cu limitacion	26
Reclassering	26
Abuso general	27
Vivienda social	27
Abuso sexual	27
Fortifica e veiligheidshuis	28
Bijstand y onderstand	28
Introduci un cas di diversidad (LGBT Center)	28
LABOR	29
Desaroya un centro di oportunidad	29
Introduci un Arbowet	29
Ampliacion di ley laboral cu seccion pa hoben	30
Sindicalismo automatico pa trahado di negoshi grandi	30
Flexibilidad laboral	30

Introduci ley di inclusion (gehandicapten verordening)	30
Inventarisacion laboral	30
Reduci mercado informal	31
Ouderschapsverlof	31
Universal Basic Income (UBI)	32
CULTURA Y DEPORTE -	32
YABINAN PA UN ARUBA SANO Y SOSTENIBEL	
Cultura	32
Beneficianan socio-economico	33
Maneho integral y sostenibel	33
Preservacion di nos patrimonio cultural y natural	34
Papiamento	35
Cultura y enseñansa	35
Fondonan	36
Cultura y desaroyo economico	37
Duna balor na nos pasado y nos diversidad cultural	38
DEPORTE	40
Areanan di atencion: piramide deportivo	40
Gruponan di enfoke	40
Profesionalisacion sector deportivo	41
Facilidadnan deportivo	41
Fondo / Subsidio	42
Deporte y desaroyo economico	42
Deporte y salubridad publico	43
Deporte y enseñansa	43
Centro di alto rendimiento - Topsport	44
Maneho integral y sostenibel	45

#BanBibaMiho
WWW.ACCION21.COM

MINISTERIO DI BIENESTAR HUMANO

ACCION21 kier uni enseñansa, salubridad, asunto social, labor, cultura y deporte den un solo ministerio pa desaroya un maneho integral pa nos recurso di mas importante, nos capital humano. Aruba ta bendiciona cu capacidad y talento excepcional den enseñansa, salubridad y cultura. Mas cu un minister individual pa carga un vision, mester fondonan di inversion. Cada ministerio ta costa entre 10-20 miyon anualmente, uni dos of tres ministerio ta libera entre 20-40 miyon adicional cu por ser inverti den e respectivo carteranan. Nos kier brinda nos profesionalnan capacita di e veld e recursonan necesario pa por ofrece nos ciudadanonan e miho nivel di enseñansa posibel, e miho nivel di cuida posibel, e miho oportunidadnan posibel, pa nos tur por BIBA MIHO.

ENSEÑANSA

ENSEÑANSA 2050

Aruba a stipula un vision den su Plan Educacion Nacional 2030, caminda a establece varios meta y a defini di ki forma lo kier realisa e metanan den Enseñansa. Faltando 6 aña pa e plan aki caduca, e momento a yega pa nos para keto y hunto evalua unda nos ta, kiko nos a logra y kiko falta. E resultado di e analisis aki mester sirbi como base pa asina defini e plan di accion pa e vision Enseñansa 2050.

Educacion ta un derecho humano fundamental y e fundeshi pa paz y desaroyo sostenibel di un pais. ACCION21 ta consciente di su responsabilidad pa garantiza e derecho fundamental aki di tur ciudadano di pais Aruba. Den su vision pa Enseñansa 2050, ACCION21 ta boga pa modificacion y adaptacion continuo di e sistema y su procesonan cu ta genera y garantiza e derecho fundamental di e siñado y ekipa cada cuidadano pa e retonan cu nos pais y mundo ta enfrenta den siglo 21. Enseñansa 2050 mester bira un contrato social caminda di un forma participativo cada miembro di Aruba ta uni na e esfuerzo colectivo y contribui cu conocimiento y innovacion necesario pa duna forma na un futuro sostenibel hancra den husticia social, economico y medioambiental.

Nos di ACCION21 ta enfoca riba Enseñansa 2050 cu ta CONECTA, EMPODERA y TRANSFORMA nos comunidad pa asina cada ciudadano BIBA MIHO!

CONECTA

Como ser humano nos ta diseña biologicamente y socialmente pa conecta cu otro loke ta esencial pa nos sobrevivencia. Educacion tampoco ta un proceso aisa, sino e ta hopi liga na nos relacion cu tur aspecto di bida. Siñamento ta un proceso continuo di baby te adulto mayor. Enseñansa di 2050 mester ta un ecosistema cu ta:

- Organisa pedagogia ariba principianan di cooperacion, colaboracion y solidaridad;
- Desaroya curiculo cu e enfasis ariba siñamento ecologico, intercultural y interdisciplinario di un forma mas practico;
- Fomenta y stimula scolnan como centronan educativo protegi pa inclusion, equidad y bienestar individual y colectivo;
- Facilita tur oportunidad pa desaroya y stimula siñamento pa bida largo y no solamente den scol;
- Stimula investigacion y generacion di data pa promove renobacion continuo di e sistema y procesonan di Enseñansa na un forma efectivo, eficiente y sostenibel;
- Conecta na nivel di organizacion,

interdisciplinario, inter social y cultural pa facilita un transicion fluido y eficaz pa e siñado y e maestro .

TRANSFORMA

E forma con nos a bin ta organisa enseñansa a hunga un rol fundamental den transformacion continuo di nos sociedad. UNESCO den su rapport “Reimagining our futures together: a new social contract for education” (2021) ta reconoce e poder di enseñansa pa sigui stimula cambio profundo y transformativo den e sociedad di siglo 21. Como pais nos ta enfrenta e reto di keda cumpli cu e promesa di garantia e derecho na educacion di calidad pa tur mucha, hoben y adulto, y probecha plenamente di e potencial transformador di enseñansa como vehiculo cu ta hiba nos na un futuro colectivo sostenibel. Pa logra e vision aki, ACCION21 ta boga pa un contrato social renoba caminda enseñansa y derechonan humano ta forma e fundeshi pa por atende cu inhusticia, desigualdad y inequidad y na mes momento transforma e futuro di Aruba di un forma integral. Enseñansa no solamente mester brinda conocimiento y habilidad, pero mas cu tur cos mester genera transformacion profundo, continuo y perdurabel di e siñado como hende den un comunidad di siglo 21. E mester bira e simiya cu ta nace, crece y duna fruta cu ta sirbi

e necesidadnan individual y di un comunidad cu ta biba miho y den harmonia cu otro.

EMPODERA

Den Enseñansa 2050 e siñado y e maestro mester forma un ekipo empoderador cu ta busca y construi conocimiento continuamente hunto. Enseñansa 2050 mester desaroya ciudadanonan participativo y responsabel pa e bienestar di nan mes y di Aruba. E siñado ta wordo stimula pa tin mas participacion y control den su proceso di educacion, desaroyando habilidadnan di pensamiento critico y bira mas independiente. E siñado no ta solamente wordo prepara pa un profesion pero pa enfrenta bida y e retonan su dilanti como ciudadano responsabel di pais Aruba den e realidad di siglo 21.

E rapport di United Nations hunto cu International Labor Organization ‘Transforming the teaching profession’ (2023) ta reafirma ACCION21 su vision caminda e maestro ta keda e factor central pa transformacion di sistema y procesonan di enseñansa. Pa por logra esaki e profesion di maestro mester wordo rebalorisa y redifini di un forma colectivo, responsabel y sostenibel pa atende cu e necesidadnan di e siñado di siglo 21. ACCION21 den su vision kier stimula tur scol, nan directiva,

comunidad, familia y instancianan den comunidad, incluyendo politica partidista, pa uni di un forma solidario rond di e maestro. Nos kier reconoce den accion y decision, e importancia di su trabao y crea condicionnan continuo cu ta permiti'e eherce su trabao di un forma exitoso y sostenibel. Esaki na su turno por pone cu e maestro ta empodera e siñado di siglo 21.

E SIÑADO

Ken ta un siñado? Den enseñansa formal nan ta participante di Enseñansa preparatorio te Enseñansa profesional (intermedio of halto) y Enseñansa universitario. Sinembargo, un siñado su proceso di siñamento ta sigui despues di su enseñansa formal. Siñamento ta un proceso continuo di un ser humano durante e diferente etapanan di su bida, di baby te adulto mayor. Considerando e puntonan menciona, ACCION21 ta boga pa un maneho nacional cu ta stimula siñamento pa bida largo.

ACCION21 kier sigura cu e desaroyo educacional di e siñado ta crea un ciudadano di Aruba y di mundo responsabel y empodera pa conhuntamente crea un Aruba y Mundo MIHO PA BIBA. Pa soluciona e retonan nos dilanti, ta necesario pa tin habilidadnan pa funciona optimalmente den siglo 21 y haya caminda den e mundo compleho existente. Por identifica e siguiente habilidadnan cu mester ser

stimula, desaroya y sosteni:

- Pensa critico;
- Pensa creativo;
- Soluciona problema;
- Habilidad computativo (un manera practico y creativo pa atende problema usando instrumentonan digital);
- Habilidadnan basico di ICT;
- Sabiduria di medianan di comunicacion;
- Colabora y traha den ekipo;
- Habilidadnan cultural y social (ciudadania);
- Auto-regulacion.

Cu e metodo didactico actualisa y eficaz por logra siña e habilidadnan menciona. Pa desaroya e habilidadnan di siglo 21 di e siñado, e maestro mester adapta su rol y didactica. E curiculo mester wordo modernisa pa crea un ambiente cu ta stimula habilidadnan di siglo 21.

Siña e habilidad y actitudnan rekeri ta exige primordialmente conocimiento y experticio di e disciplina (materia). Ta importante pa conscientisa e siñado di e forma con nan ta studia y con nan ta procesa informacion pa adkiri conocimiento. E ta yuda pa stimula un actitud curioso y conecta cu ta influencia e motivacion intrinseco pa siñamento.

E desaroyo di e habilidadnan di siglo 21 por ser mehora door di ofrece Enseñansa 'significativo di bida real,' p.e. door di integra materianan den disciplinanan amplio.

ACCION21 ta boga pa duna poder na nos siñadonan pa ta exitoso den siglo 21 door di:

- Ehecuta un midimento di base 'nulmeting' pa determina cuanto habilidadnan di siglo 21 nos ta ofrece actualmente na tur nos scolnan;
- Adapta e norma pa financiamiento/ 'normbedrag' na locual realmente ta e necesidad di e diferente tipo di enseñansa;
- Actualisa y desaroya e curiculo riba tur nivel di Enseñansa formal pa asina nos siñadonan por crece y sobresali;
- Incorpora conscientisacion di bestia y medio ambiente den e curiculo di scolnan preparatorio y basico;
- Un maneho di idioma 'taalbeleid' mas flexibel;
- Introduci e materia Desaroyo Propio riba tur nivel di scol den e curiculo. Desaroyo Propio ta ekipa e alumno cu habilidadnan riba nivel social emocional. E materia aki ta traha preventivo door cu e alumno ta siña hermentnan pa por maneha retonan di bida;
- Provee material di scol di siglo 21 den e sentido mas amplio dje palabra;
- Haci posibel actividadnan extra curricular na tur scol (preparatorio, primario y secundario). Siñadonan despues di orario di scol, por keda eynan pa siña habilidadnan (enfoca riba esnan di siglo 21). Ofrece deporte, expresionnan creativo, debati, programanan di computer,

- plantamento y mas te cu 6.00 pm. E actividadnan extra curricular ta ser ofreci (gratis of prijs simbolico) door di fundacion, compania priva, departamento di gobierno (e.o. Sta. Rosa/IBISA/DCA/BNA). Edificionan escolar despues di 1.30 pm (primario) of 3.30 pm (secundario) ta bashi. Mediante actividadnan extra curricular e edificionan lo ser uza optimalmente;
- Ofrece den tur nivel di educacion y pa comunidad formacion civico e.o. door di brinda informacion di Aruba su organonan di estado, sistema parlamentario y politico;
 - Promove conocimiento di derechonan humano den scol y pa comunidad general. Tur miembro di nos sociedad mester por haya e informacion y instrumentonan pa tin un bon comprension di con nos pais ta funciona y ta ser maneha. ACCION21 ta kere sagradamente den sostene y aporta na e desaroyo di ciudadanonan bon informa;
 - Miho guia pa scoge pakete educacional/'profielen';
 - Miho guia pa siñado durante e proceso di investiga y scoge un estudio y carera;
 - Maneho integral di enseñansa informal y adulto continuo pa stimula siñamento pa bida largo.

STRUCTURA DI CUIDO

Sentimento di siguridad durante e proceso di siñamento ta instrumental pa logra participacion y resultadonan maximo di participantenan y maestro-/educadornan. ACCION21 kier garantisa esaki door di:

Un structura di cuidado (cu ta optimal y sostenibel) pa tur scol den enseñansa formal. Entre otro door di duna entrenamiento na tur maestro pa reconoce e pasonan cu mester ser tuma den señala problema-/situacionnan social di siñado;

E trabou di consehero/'counselor' mester ta uno tempo completo 'fulltime' na cada scol;

Un protocol pa atende intimidacion 'bullying' cu ta actualisa y cu ta funciona optimalmente;

Un consejo studiantil y consejo participativo (medezeggingschapsraad) pa tur scol. Esaki pa stimula participacion di siñado, personal y mayornan pa haci'e scol un miho comunidad;

Mas trahado social y maestro mediador pa tur scol. Na e momento aki, p.e. pa tur scol di SKOA (46) tin solamente 3 trahado social den servicio;

Disponibilidad di guia psicologico pa maestro y participante. Actualmente pa 1.500 maestro na Aruba tin solamente un psicologo disponibel;

Maneho integral social-emocional pa tur personal di tur scol na Aruba.

E MAESTRO

Pa por desaroya e habilidadnan di siglo 21 di e siñado, e maestro tin cu incorpora nan den e curiculo y percura cu conscientemente ta traha riba nan. Siña habilidad y actitud ta rekeri primordialmente conocimiento y experticio di un disciplina. Ta importante pa conscientisa e siñado di e forma con nan ta adkiri conocimiento y con nan ta procesa informacion pa conocimiento. Ta yuda pa stimula un actitud curioso y responde riba e motivacion intrinsico pa siña.

Nos maestronan mester ser sosteni y haya training/upgrading pa por haci esaki. Den consulta cu e veld di Enseñansa a identifica algun punto di enfoke pa por logra esaki.

ACCION21 ta sostiene e siguiente puntonan di accion:

- Adapta maneho di tarea (taakbeleid) cu ta resulta den mas espacio pa profesionalisacion;
- Evalua y expande curiculo di IPA;
- Introduci e posibilidad pa por studia tempo parcial na Aruba (MBO, HBO y WO). Esaki ta haci'e atractivo pa studia banda di bo trabou (salario ta necesario pa mantene bo famia y bo mes) y sigui desaroya bo mes, pero tambe ta stimula enseñansa pa bida largo;
- Haci salario di maestronan y di personal di apoyo competitivo;
- Maestronan ta haya anualmente un 'promocion di experticio' activo door di introduci un ciclo (di tres año) di progreso, funcionamiento y

evaluacion. E promocion aki ta ser duna a base di e shete competencianan di e maestro. Mediante e introduccion di promocion di experticio, e sostenibilidad y calidad di e maestro ta ser garantisa;

- Cuido y sosten social-emocional pa maestro. Un ehempel ta introduci un persona di confiansa pa maestro;
- Asistente di maestro, banda di asistente di maestro tecnico, pa tur scol;
- Un miho guia pa maestro y refresca su conocimiento anualmente tocante estudionan nobo y/of opcion pa estudio adicional pa apoya e siñado. Esaki por apoya e decano pa guia y conseha siñadonan.

Den e vision di Enseñansa 2050, ACCION 21 tambe ta mira e importancia di:

- Adapta pedagogia y haci reforma di curiculo hunto cu e maestro como parti integral di e proceso;
- Fortalece iniciativanan pa stimula enseñansa pa e no keda limita den e cuatro murayanan di un local;
- Defini y renoba descripcion di funcion y tarea den taakomschrijving pa maestro y empleadonan di apoyo den Enseñansa pa trece esaki mas na e realidad y necesidadnan actual;
- Stimula oportunidadnan pa e maestro of scol por experimenta cu diferente tiponan di conceptonan di educacion den les;
- Maneho structura y integral pa combati embebecimento ‘vergrijzing’

y retencion di maestronan cualifica.

MINISTER DI BIENESTAR HUMANO Y DEPARTAMENTO DI ENSEÑANSA

Aruba ta conta cu mas o menos 22.000 siñado cu ta studia na diferente scol y instituto. Minister ta responsabel pa e calidad di Enseñansa na Aruba conhuntamente cu Departamento di Enseñansa, Inspectie Onderwijs, Bureau Leerplicht y directivanan escolar. Ministerio tambe ta responsabel pa e calidad di infraestructura, proceso y sistema di tur scol y instituto.

DEPARTAMENTO DI ENSEÑANSA

- Adapta y/of cambia e leynan necesario pa asina Enseñansa por desaroya;
- Inventarisacion di e necesidadnan financiero di tur nivel escolar pa tin un bista concreto di e situacion actual;
- Introduci un mecanismo di financiamiento pa busca financiamiento internacional y/of subsidio;
- Percura pa profesionalisa maestro riba presupuesto, ‘budget professionalisering’;
- Desaroya un curiculo cu ta garantisa habilidadnan di siglo 21 pa tur nivel escolar. Modernisa y optimalisa e kerndoelen pa siglo 21;
- Revisa, adapta y innova e metodonan

pa scol special (primario y secundario). Es decir actualisa y modernisa esaki pa asina e siñadonan por ta miho prepara pa mercado laboral;

- Percura pa tin control (contenido) di nivel pa examen escolar (SE) y examen central (CE) cu ta ser traha na Aruba. Esaki ta posibel via un laso di cooperacion cu CITO;
- Traha un plan a largo plaso/multi-annual pa innovacion di tur nivel di Enseñansa.

DIENST INSPECTIE VAN HET ONDERWIJS

Por haya e tareanan central di Inspectie Onderwijs riba www.ea.aw

- Percurapacumplicueprescripcionnan legal relaciona cu Enseñansa;
- Raporta y conseha e Minister y otro stakeholders tocante desaroyonan señala;
- Evalua e calidad di Enseñansa;
- Stimula e scolnan pa traha riba nan propio calidad di cuida.

Den transcurso di añanan e tareanan a keda basta negligisha. Un inspeccion cu ta funciona optimal lo contribui pa e nivel di Enseñansa sobresali na Aruba. ACCION21 kier facilita Inspectie Onderwijs pa alcanza e tareanan aki door di:

- haci un nulmeting pa constata tur e retonan cu tin den Inspectie Onderwijs;
- optimalisa Inspectie Onderwijs door di traha hunto cu Inspeccion di Hulanda.

BUREAU LEERPLICHT

Na Aruba nos tin e ley di leerplicht. ACCION21 kier modernisa e ley aki pa asina e siñado por saca lo maximo di su mes. Pa logra esaki ta necesario pa e leerplicht (cu ta cuminsa desde Enseñansa primario te ora un siñado tin 16 aña) ser modernisa y adapta pa un startkwalificatie. Un startkwalificatie ta un diploma di HAVO, VWO, MBO nivel 2 (basisberoepsopleiding di Hulanda) of mas halto.

Cu un startkwalificatie bo tin mas oportunidad pa haya un trabao. Pa e motibo aki ACCION21 ta boga pa adapta leerplicht pa un startkwalificatie. Asina mas siñado tin un miho oportunidad riba mercado laboral y nan por crea un miho bida pa nan mes y nan famia.

Nos tin e siguiente puntonan di accion pa Bureau Leerplicht:

- Adapta e ley di leerplicht pa startkwalificatie;
- Un control y mantencion funcional di e startkwalificatie;
- Un miho fluho y conexion entre tur nivel di educacion.

DIRECTIVA ESCOLAR

- Establece lasonan formal di cooperacion cu institucionnan educacional;
- Haci posibel e participacion di sector priva pa por inverti den educacion profesional (beroepsonderwijs);
- Educa lidernan institucional tocante

- manejo di presupuesto;
- Conecta necesidadnan presupuestario na e Plan Educacion Nacional (PEN 2030);
- Inventarisa continuamente riba tur nivel kico e necesidadnan di e specialistanan ta, incluyendo p.e. suficiente personal di ICT. Momentaneamente digitalisacion di Enseñansa ta ser prepara, pero no tin suficiente personal pa ehecuta esaki debidamente;
- Haci uzo di institucion y expertonan local (e.o. IPA y UA);
- Informa docente kico e posibilidadnan ta di trekkingsrecht y presupuesto di formacion (transparencia);
- Anualmente liderazgo mester discuti y stimula promocion di experiencia (deskundigheidsbevordering) cu maestro;
- Inclui dia di estudio (studiedagen) obligatorio den e programa anual. Na Hulanda, p.e. na MBO, gobierno ta duna cincuentinuebe (59) ora anualmente na un maestro pa e por uza pa promocion di experiencia. Maestronan mester sinti cu nan por y mag di profesionalisa legitimamente sin sinti nan mes obstaculisa;
- Un cultura di cooperacion ta promove y stimula intercambio di conocimiento;
- Facilita otro forma di 'Enseñansa tradicional,' pensa riba Enseñansa basa riba proyecto of estilo 'Dalton' y 'Montessori' etc.

INFRASTRUCTURA, PROCESO Y SISTEMA

- Gasto pa mantencion di facilidad, mueble, diseño y instalacionnan (digital) mester ser traslada pa e ministerio responsabel pa infraestructura;
- Decentralisa scol di ministerio pa asina e directivanan escolar por tin mas control riba kico ta pasa na scol;
- Aboli nombramentonan politico;
- Introduci norma cu ora ta yena tur vacatura, mester sigui un procedura di solicitud transparente y husto;
- Crea un plataforma cu ta stimula intercambio y comunicacion entre tur stakeholder di Enseñansa. Dos ehempel di plataforma cu ta haci esaki ta Erasmus+ y eTwinning;
- Expande y mehora infraestructura pa digitalisacion den Enseñansa.

EPB Y EPI (PROYECTONAN DI INCLUSION)

Nos di ACCION21 kier traha, den cooperacion cu EPI y EPB, riba mas inclusion di e calidadnan di nos siñadonan pa asina nangana experiencia. Esaki nos kier logra e.o. desaroyando proyecto:

- Un kinderverblijf subsidia pa fondonan y/of sector priva. Pa asina mayornan hoben por sigui nan estudio na EPI sabiendo cu nan yiunan ta sigur. Un bentaha adicional

di esaki ta cu studiantenan di EPI di e sector di 'Cuido y Bienestar' por sigui nan pasantia na e kinderverblijf aki;

- Un oficina di administracion subsidia pa fondonan y/of sector priva. Asina siñadonan di EPI/EPB di e sector 'Administracion' por ofrece nan servicio na un prijs atractivo pa negoshi chikito y mediano. Mediante e proyecto aki lo crea luganan di pasantia pa siñadonan di EPI/EPB;
- Un espacio di exhibicion subsidia pa fondonan y/of sector priva. Asina siñadonan di EPI/EPB di sector 'Ciencia y Tecnologia' ta haya e espacio pa exhibi nan proyectonan. Empresarionan por bishita e centro aki y hiba proyecto (contra pago) den nan propio desaroyo, pensa riba mueble diseña, desaroyo tecnico etc. E siñadonan ta ser exponi cu consecuencia mas facilmente un negoshi por ofrece nan un luga di pasantia.
- Tayernan subsidia pa fondonan y/of sector priva. Esaki por inclui p.e. 'con bo ta come saludabel.' E sector 'HORECA', door di nan cushina extenso, ta ofrece posibilidad pa duna tayer na e Arubano cu mester ayudo pa cushina un plato saludabel pa su famia. Asina tambe luganan di pasantia pa siñadonan di EPI/EPB ta ser crea.

ACCION21 ta convenci cu nos scol y siñadonan tin hopi talento. Facilitando e tipo di proyectonan aki pa medio di adaptaley y crea fondonan, nos siñadonan

ya durante nan estudio por duna un aporte valioso na nos sociedad. Ademas nan ta traha riba nan habilidadnan di siglo 21. Haciendo e proyectonan aki posibel, bo ta percursa pa mas inclusion, di scol, siñado y negoshinan di Aruba.

CONSCIENTISACION - PA TUR SCOL

Enseñansa mester kier haci di su siñadonan ciudadanonan di mundo consciente. Un instrumento pa forma ciudadanonan di mundo ta pa tin conscientisacion como un punto di agenda. Conscientisacion por stimula y pa e motibo ey nos kier pa scolnan duna mas atencion n'e contenido di conscientisacion:

- Desaroya un maneho integral y sostenibel nacional di inclusion y diversidad den enseñansa pa tur scol na Aruba incluyendo p.e. Dia Internacional di Salud Mental (october), Dia Internacional di Derecho di Mucha (november), Diabierna Biña, LGBTQ awareness (december) etc.

E tipo di programanan aki hopi biaha por ser desaroya cu asistencia di instancianan cu hopi biaha por provee materialnan pa nan ehecucion.

ENSEÑANSA CONTINUO

Enseñansa pa adulto lo ta diferente na 2050. Segun economia mundial y sociedad ta cambiando enseñansa pa adulto lo mester transforma den mas cu

un proceso pa duna competencia laboral. E realidad ta cu nos ta un comunidad chikito cu un problema creciente di vergrijzing. Pero bira grandi y avansa di edad no kiermen bira inutil. Segun nos ta move den siglo 21, e maneho nacional di enseñansa den practica mester enfoca mas riba e ciclo di bida completo di e individuo y pone atencion special na e adulto y e adulto mayor. ACCION21 ta comprometi pa defini di ki forma enseñansa por brinda diferente oportunidad pa fortalece enseñansa pa bida largo caminda tur ciudadano sin distingui unda nan ta den edad por tin acceso igual na educacion.

ENSEÑANSA Y OTRO TERENO DI DESAROYO

Nos di ACCION21 ta reconoce e importancia di educacion y su relacion cu otro terenonan di desaroyo.

- Mercado laboral, p.e. actualmente tin un necesidad pa 1.000.000 programmers den Latino America y Caribe y 1.200.000 na Norte America. E demanda lo sigui crece cu desaroyo di inteligencia artificial y su aplicacionnan. Actulamente nos sistema di enseñansa formal no ta ofrece niun curso den programming. Esaki ta un oportunidad perdi mirando cu hopi di e trabao nan aki por ser haci remotely habriendo posibilidad pa nos siñadonan local;
- Salubridad;
- Fortificacion di sentido comunitario;

- Cuido y formacion di mucha, formacion pre-escolar ta duna participantenan un fundeshi y bentaha den Enseñansa;
- Sosten adicional pa siñadonan den situacion economico desbentahoso.

FINANCIAMIENTO DI ENSEÑANSA

ACCION21 lo repriorisa gastonan di gobierno y hisa inversion den enseñansa te cu seis (6) porciento (actualmente rond di 4,6%) di GDP durante proximo periodo di gobernacion. Esaki lo nifica un aumento di rond di 100 milyon florin extra pa Enseñansa cu lo ser introduci den fase cu 25 milyon adicional tur año durante cuatro año.

METODONAN PA FUTURO

Enseñansa mester alinea miho cu desaroyonan moderno y adapta metodonan ta un enfoke di ACCION21.

- Enseñansa no ta berdaderamente amistoso pa e siñado. Tin masha poco papiamento cu siñado den scolnan. Hopi ta imponi riba siñadonan pa maestro, comunicacion ta di un banda so. Con esaki ta pone e siñado sinti? Nan opinionan riba klas, scol y actividadnan escolar ta ser scucha y balora? Si siñadonan ta gusta bay scol ta ser considera importante? ACCION21 ta kere cu siñadonan mester gusta bay scol y nan opinion y sentimentonan mester conta.
- Enseñansa no mester ta laf y

monotono. Actualmente tin poco variacion den e trabao cu siñadonan mester haci na scol. Enseñansa mester ta mas desafiante y cosecha fantastia pa hisa compromiso di e siñado y mayornan.

Kiko mester cambia?

- Cada scol mester haya mas responsabilidad pa enseñansa na scol y desaroya su mesun plan pa logra e metanan;
- E punto di salida di Enseñansa mester ta desaroyo total, desaroyo di e personalidad di un siñado;
- E rol di maestro mester evoluciona. Nan tarea principal mester bira provee un ambiente agradabel caminda e siñado ta tribi expresa su mes y sinti su mes comodo. Tambe tin un cambio di maestro pa facilitado. Maestro mester tin un rol importante den e composicion di curiculo na scol;
- Departamento di Enseñansa ta provee preconditionnan pa bon Enseñansa y ta mete menos cu e contenido di Enseñansa;
- Directivanan ta provee e facilidadnan necesario pa un scol desaroya y implementa su mesun ruta na metanan di Enseñansa;
- Instituto Pedagógico Arubano (IPA), mas seleccion di maestro cu curason pa e ofishi y conexion cu metodonan nobo;
- Inspectie Onderwijs controla, guia, curasha y crea oportunidadnan nobo.

Con?

Door di instruccion tematico. Material

di materianan di geografia, historia, conocimiento di naturalesa, trafico, estudionan social, religion etc. ta ser converti den temanan, caminda lineanan di desaroyo continuo ta decisivo. Uso di hermentnan moderno di Enseñansa ta excelente pa esaki.

Enseñansa tematico ta basa riba tres necesidadnan hopi importante pa e siñado. Prome, tin e necesidad pa relacionnan. Un siñado kier sinti su mes confortabel. Pesey brinda siguridad ta un prerequisite pero adicionalmente un siñado kier sinti acepta, pa ta parti di un grupo y pa sinti bon bini.

Segundo, siñadonan mester sinti cu nan ta desaroyando. Nan mester reconoce cu nan sa y por haci mas y mas.

Tercero, siñadonan mester experiencia un cierto libertad. Nan mester reconoce cu e desaroyo cu nan ta experencia ta parcialmente determina pa nan mes, cu nan mes ta un enlace den e proceso di siñamento educativo.

E metodo aki ta produci siñadonan completamente diferente. Den areanan social, oral y skirbi nan tin hopi mas experticio y nan desaroyo cognitivo ta hopi mas halto paso nan ta involucra den loke nan ta siña. Adicionalmente ta haci un yamada na nan talentonan existente, riba nan imaginacion y tin hopi variacion den e metodonan cu nan ta traha.

E siñadonan aki ta gusta bay scol.

CaracteristicanandieformadiEnseñansa aki:

- Siñadonan ta disfruta un experiencia di enseñansa primario hopi mas agradabel;
- Siñadonan ta creativo den haci y pensa;
- Siñadonan ta hopi mas firme den nan sapato;
- Siñadonan ta experiencia hopi menos cijferdruk;
- Siñadonan ta siña traha riba nan mes y den grupo;
- Siñadonan y mayornan ta hopi mas involucra;
- Maestronan ta asumi un rol diferente cu ta curasha nan pa ta mas comprometi cu nan scol;
- E ta ofrece hopi mas oportunidad pa actualisa curiculo;
- Mas y miho uso di ICT;
- Talento presente den siñadonan ta mas reconoci y por wordo desaroya miho;
- E nivel di compondemento di lesa ta hopi mas halto.

ACCION21 lo kier introduci estudionan regular y structural di nos siñadonan.

SALUBRIDAD

Aruba ta enfrenta diferente retonan den cuidado cu mester di atencion urgente. Mientras tin lista di espera largo den hopi area di cuidado, nos profesionalnan tambe mester di mas ayudo y sosten. Falta di personal ta un tema persistente

y ACCION21 kier mira renumeracion competitivo (cu otro partinan di Reino) pa por atrae mas profesionalnan medico bin traha na Aruba. Nos vision ta crea un estructura di cuidado cu ta inclui cuidado preventivo caminda e pashent ta central.

CUIDO PREVENTIVO

Nos kier expande mision y meta di AZV cu un proposito mas amplio y cambia e landsverordening zieke-en ziektekostenverzekering pa sigura cu AZV por ofrece cuidado preventivo y no solamente curativo. Esaki lo inclui examinacion regular di pashentnan asina facilitando diagnostico mas temprano y te hasta por yuda preveni desaroyo di malesanan. Examinacion regular dental pa persona di tur edad tambe lo ta parti di expansion di cuidado preventivo. ACCION21 ta di opinion cu a largo plazo esaki lo reduci e gastonan di AZV y mehora cuidado pa nos poblacion.

FORTIFICA AZV Y DVG

Nos ta kere cu e siguiente departamentonan mester di fortificacion sea door di mas fondo y/of personal.

- Gele Koorts en Muskieten Bestrijding (GKMB);
- DVG – Department of Food and Consumer Product Inspection and Hygiene ta encarga cu tur control na hotel, restaurant etc. y nos kier fortifica e toezichhouders den forma di

bijsholing. Asina nan lo por desplega nan trabao di un forma responsabel segun standard internacional;

- Servicio Veterinario lo mester evalua si nan lo kier keda den servicio di DVG of si nan lo kier habri nan practica pa elimina cualkier conflicto di interes;
- Servicio di registracion di personal medico lo mester keda actualisa mas regularmente pa garantiza un miho bista di kende ta trahando;
- Evalua Kwaliteitsinstituut Aruba cu of bao supervision di Ministerio di Salud y Inspeccion Hulandes;
- Separa Inspeccion di Remedi for di Inspeccion di Salud Aruba (IVA) manera tabata stipula den e Ordenanza Inspeccion di Remedi prome cu IVA a keda funda;
- Fortifica Inspeccion di Salud Aruba (IVA) pa por tin un miho bista riba calidad y siguridad di henter sector di cuidado, cu a cuminsa funciona desde 1 januari 2017;
- Nos mester mas handhaving, mester acredita toezichthouders pa asina por mihor controla unda fondonan ta bay, fortifica manehonan existente y introduci esnan cu falta.
- Capacitacion regional y planificacion di capacidad di personal di cuidado;
- Inventarisa gastonan di salario dentro di AZV;
- Fortifica prome linea di cuidado y introduci mas oficina di dokter di cas combina pa aumenta eficiencia y expande orarionan di servicio pa reduci presion y cuidado mas costoso na hospital;
- Mehora comunicacion entre dokternan local y introduci un plataforma nacional pa informacion medico cu ta conecta tur proveedor;
- Mehora comunicacion entre dokternan local y dokternan den exterior ora ta manda pashent pa tratamiento afor. Sigura cu nan behandelingsplan ta continua despues di nan regreso;
- Mehora control door di introduci un behandelingsovereenkomst pa pashentnan cu bay den exterior cu boet si e hospital y dokter den exterior no cumpli dentro di e tempo acorda;
- Establece un Call Center cu ta na altura di pashentnan den exterior y un estado actualisa di nan tratamiento;
- Conscientisa pueblo tocante e costo di nan cuidado door di comparti recibonan;
- Desaroya un plan structural cu por sigura continuidad di AZV den futuro sin corta den e basispakket;
- Mehora educacion tocante alimentacion saludabel.

GASTONAN DI AZV

Nos ta kere cu sigura un maneho mas eficiente posibel di AZV lo provee miho cuidado pa nos ciudadanonan y garantiza e fondo pa futuro generacionnan.

- Adkision conhunto di medicamento, recurso, material y ekipo (cu hospitalnan den territorio Caribense di Reino);

SALUD MENTAL

Na Aruba actualmente unicamente rond di binticinco (25) por ciento di esnan den necesidad di cuidado pa salud mental ta haya tratamiento. Demanda ta hopi mas grandi cu capacidad y mayoria di casonan lo por wordo trata pa psicologo. Nos ta kere ta importante:

- Profesionalisa loke nos tin;
- Alcansa pashentnan acute;
- Apoya dokternan di cas.

Aworaki ta inaceptabel cu 7-8k hende tin derecho di cuidado pero no ta ricibi'e y cu te hasta den casonan di mucha e lista di espera ta demasiado largo.

Percura cu gobierno su 'Flexible Assertive Community Treatment (FACT)' team ta bon ekipa cu personanan capacita pa atende cu e retonan den cuidado di salud mental.

Mester mehora e compartimento di data entre e diferente instancianan incluyendo dokternan di cas, Respaldo y Stichting Hunto. Tambe mester mehora e facilidad pa dokternan di cas por transferi pashent pa Respaldo.

Studia e posibilidad di centralisa cuidado pa salud mental y combina Respaldo y Stichting Hunto.

Profesionalisa estudio pa cuidado di salud mental na Aruba y hisa e cantidad di p.e. GZ psicologo.

Reestablece e proyecto di entrena

suficiente GZ psicologo pa ofrece cuidado pa salud mental na tur oficina di dokter di cas un dia pa siman.

ADICCION

Nos lo kier inverti mas den centro di rehabilitacion pa mehora cuidado pa nos adictonan. Adiccion ta un sintoma y como parti di cualkier programa di rehabilitacion mester inclui tratamiento psicologico. Tambe nos kier sigura cu tin suficiente 'halfway house' pa brinda adictonan den recuperacion un stap intermediario pa nan saneamento y eventual reintegracion den sociedad y mercado laboral. Nos kier mira mas programa di educacion como parti di nos curriculopaconscientisamuchanandesde un edad jong di comportamentonan adictivo y recursonan di ayudo manera gruponan di auto-ayuda.

EUTANASIA

Den discusion tocante eutanasia mester considera pashentnan cu ta terminal y tin e deseo pa termina nan bida pa por mitiga mas sufrimento. Nos ta kere cu despues di restructuracion di nos sistema di salubridad publico, lo ta apropiado pa studia e tema di eutanasia y con miho por estructura esaki hunto cu guia y sosten pa famia.

Un estudio cientifico di un muestra aleatoria di 1.529 hende na Aruba cu nacionalidad Hulandes y derecho di voto na 2021 a demostra cu cuarentitres (43)

porciento di nos poblacion ta di opinion cu eutanasia ta hustificabel, trintiun (31) porciento ta contra y bintishete (27) porciento no tin opinion. E siguiente pasonan ta:

- Haci un estudio pa determina e demanda pa eutanasia;
- Crea un concepto di ley cu lo por keda introduci pa establece y regula e procedura.

PERMITI REMEDINAN ALTERNATIVO

Como partido liberal progresivo nos ta kere firmemente den brinda e libertad na e individuo pa por explora tratamentonan alternativo bao guia di un profesional. Nos ta kere den ampliacion di remedinan disponibel pa no solamente uso di p.e. CBD Oil y otro productonan manera remedinan natural. Por ehempel, den caso di un persona cu un solo riñon ta importante incorpora mas remedi natural cu ta posibel pa salvaguardia su sobrevivencia.

Na Aruba antes tabata tin un cultura grandi di curandero cu tabata haci uso di mata y otro remedi natural pa sana y sostenepersonanancuresultadopositivo. Na Reino Unido e National Health Service ta inclui e posibilidad di tratamiento segun medicina Chines tradicional. Na Cuba ta utiliza acupuntura como parti di nan sistema nacional di salud. Nos ta kere si AZV cubri cierto tratamentonan alternativo cu a demostra di funciona y tambe remedinan natural wordo miho controla por tin beneficio holistico pa nos pashentnan.

DERECHO DI MUHE PA SCOGE

Nos ta kere cu termina un embaraso ta un di e decisionnan mas dificil cu un hende muhe mester contempla, pero nos ta kere e ta un decision cu e mester tuma den meditacion cu su creado y den consulta cu su famia. Nos no ta kere cu gobierno tin un rol den e decision, gobierno mester purba evita terminacion di embaraso door di educacion sexual y no prohibicion. Nos ta kere cu e individuo mester tin autonomia riba su mesun curpa y mester existi un sistema di control cu ta garantisa siguridad di e pashent pero tambe regulacion cu ta haci e procedura castigabel despues di p.e.16 siman pa tanto profesional medico, como pashent.

Un estudio cientifico di un muestra aleatoria di 1.529 hende na Aruba cu nacionalidad Hulandes y derecho di voto na 2021 a demostra cu cuarenta (40) porciento di nos poblacion ta di opinion cu termina un embaraso ta hustificabel, cuarentitres (43) porciento ta contra y diesshete (17) porciento no tin opinion. Como un partido liberal progresivo nos ta kere den libertad di e individuo pa haci su mesun escogencia di kiko ta lo corecto pe. Si un dia yega na legalisa terminacion di embaraso, e lo mester wordo combina cu un estructura di cuida social pa brinda e pashent tur guia y sosten pa por tuma e decision corecto pa su persona. E estructura di guia y sosten mester continua despues di e proceso pa tanto e pashent y su famia si nan ta desea.

INTRODUCI UN 'PATIENT BILL OF RIGHTS'

Nos ta kere den haci e pashent central y kier introduci un 'Patient Bill of Rights' manera ta existi na Merca pa sigura cu tur cliente di AZV ricibi:

- Informacion tocante nan tratamiento;
- Acceso na servicionan di emergencia;
- Respet y ningun discriminacion;
- Confidencialidad;
- Espacio pa haci keho, y caminda apropia cuminsa un investigacion;
- Responsabilidadnan di pashent.

INTRODUCI UN 'PATIËNTENRAAD'

Nos kier introduci un Patiëntenraad pa sigura cu e pashent por ricibi tur informacion y tambe haci keho confidencialmente den casonan caminda cos no a cana manera debe ser. Un instancia separa di AZV lo por prepara un analisis di e nivel di cuidado, sugerencianan pa mehora y tambe investiga kehonan.

ACREDITA MEDICONAN

E meta di ACCION21 ta pa facilita tur hoben Arubano practica nan carera incluyendo personanan cu a studia medicina den region. Pa logra esaki nos kier reforma ARUBIG cu ta evalua e cualificacionnan di e individuo pa sigura un continuidad of mehoracion den cuidado. Pa introduci esaki mester:

- Lanta un Instituto di Calidad, pa por

registra hobennan cu ta estudiando of a studia den region cu kier ehersenan carera na Aruba;

- E Instituto di Calidad lo traha hunto cu otro paisnan den Reino y internacional pa bin cu normanan di best practices pa mehora e calidad di cuidado medico y acreditacion;
- Institui un comision pa investiga mas posibilidad pa facilita acreditacion;
- Cera acuerdonan cu universidadnan y facilidadnan local pa Arubananan gradua den region por logra cualkier calificacion necesario localmente;
- Nos lo kier regla cu banda di e registro BIG di Hulanda, Aruba ta reconoce mediconan cu a studia den otro sistemanan.

CUIDO PA NOS ADULTONAN MAYOR

Expansion di AZV pa inclui cuidado preventivo lo ta instrumental den mehora cuidado pa nos adulto mayornan. Den nos seccion di asunto social nos ta detaya con nos kier percursa un nivel minimo di cuidado incluyendo p.e. limite ariba cuanto persona pa m² den casnan di anciano. Den nos seccion di salubridad nos ta detaya con nos kier expande AZV pa cuidado preventivo incluyendo chequeo dental.

Mester reduci e presion ariba eerste hulp door di ofrece cuidado na cas y expande orario di atencion pa inclui despues di 3:00 pm y den weekend cual Wit Gele Kruis no ta cubri.

Pensionando mester wordo exclui di cualkier recorte den cubrimiento di remedi.

Gasto di cuidado di adulto mayor ta creciendo 5% anualmente, esey ta mas cu nos crecimiento economico, ta importante pa busca eficiencianan den e sistema incluyendo:

- cuidado pa un adulto mayor mester inicia na cas y esey mester wordo mehora;
- expansion di cuidado na cas, pa hospital no keda pega cu hende cu mester bay cas pero pa falta di cuidado ta keda interna;
- na Aruba 1/3 di poblacion ta haña dementia mientras na mundo ta 7%, mester evalua ki cambionan den nos estilo di bida por trece saneamento y reduci e incidencia local;
- EPI mester yuda mehora cuidado di hendenan cu malesanan cronico;
- Fortifica SABA su esfuersonan pa traha cu HOH Academy y haci e shift di MBO 4 pa HBO;
- urgent care pa 65+ mester sosode na cas;
- reconoce cu SABA ta ofrece un nivel di cuidado mas similar cu un hospital chikito y mester fondo stabiel;
- miho cuidado pa adulto mayor cu limitacion;
- limita capacidad na casnan di adulto mayor chikito na p.e. 35 persona;
- miho regularisacion di casnan di adulto mayor.

Crea condicion digno tambe pa e casnan di adulto mayor y percura cu Inspectie

Volksgesondheid ta haci inspeccion regularmente pa asina nos tin un miho bista encuanto e situacion di cuidado.

REDUCI PREMIE DI AZV PA PENSIONADONAN

Actualmente un grupo di pensionado mester paga un premie halto pa AZV. Nan ta cu contribui tanto e werknemersdeel como tambe e werkgeversdeel y esaki nos ta considera inhuerto. Nos lo reduci premie di AZV pa pensionadonan te cu unicamente e werknemersdeel, usando parti di e surplus di AZV pa financia e reduccion.

CUIDO CRONICO

Actualmente nos tin un capacidad di 200 cama pa cuidado cronico, e necesidad actual ta pa 550 cama dus mester inverti den aumenta capacidad urgentemente. Tambe mester introduci ley pa regula cuidado cronico siguiendo e ehempel di Hulanda pa sigura cu tur nos grandinan por biba den dignidad y ricibi e cuidado cu nan merece.

IMSAN

Nos ta aplaudi e desaroyonan tumando luga na ImSan cu ta e prome hospital na Aruba y un di poco nan den nos region cu acreditacion JCI. Nos ta kere cu ImSan lo por complementa operacion na HOH den cierto area y competi cu HOH den otro. Ta importante pa AZV brinda e posibilidad pa pashent scoge

nan hospital di preferencia caminda ta posibel. Nos kier mira e sistemanan digital di e dos hospitalnan wordo conecta pa comparti dato y sigura cu no tin duplicacion di esfuerzo. Tambe nos kier mira ImSan sigui desaroya y expande, specialmente den tratamiento cu actualmente pashent ta wordo manda afo. Nos ta kere cu ImSan por hunga un rol importante den desaroyo di turismo medico y ACCION21 kier desaroya un plan structural pa facilita esaki.

INNOVACION

- Nos kier cuminsa pa cera acuerdo cu universidadnan Hulandes pa estudio di medicina pa reserva un cierto cantidad di espacio pa Aruba mescos cu nan ta haci pa Curaçao;
- Nos kier introduci mas conscientisacion ariba e importancia di alimentacion, cuminsando cu programanan na scol di nutricion;
- Nos kier desaroya p.e. un diabetes center pa pashentnan y usando tecnologia monitorea nan cuidado propio;
- Nos kier expande digitalisacion den cuidado medico y sigura cu e diferente sistemanan ta conecta y comunica cu otro.

MAS FONDO PA SALUBRIDAD Y CUIDO CRONICO

ACCION21 lo kier repriorisa gasto

di gobierno pa aloca mas fondo pa salubridad publico incluyendo cuidado di nos adulto mayor. Actualmente Aruba ta gastando rond di 8,4% di GDP riba salubridad y nos lo kier mira e suma subite cu 10% durante e proximo periodo di gobernacion. Esaki lo genera rond di 28 milyon florin extra anualmente pa e proximo cuatro añanan pa salubridad publico y cuidado cronico.

ASUNTO SOCIAL

Nos vision ta pa brinda segundo oportunidad na cada ciudadano y un estructura di cuidado y guia pa atende cu e crisis social cu ta asotando nos pais. Kamer van Koophandel a declara cu bintishete (27) por ciento di hogarnan na Aruba ta biba cu gastonan mas halto cu nan entrada. Nos tin un economia di mas di shete (7) bion florin anualmente pa un poblacion oficial di 107.000, no tin pakiko tin pobreza na pais Aruba y combati esaki lo ta prioridad number uno pa ACCION21. Nos ta un partido liberal kier men nos no ta kere cu ta gobierno su trabao di distribui recurso, ta gobierno su trabao di crea un sociedad caminda e ciudadano por ta exitoso den crea su mesun recurso. Como un partido progresivo nos nunca lo permiti niun ciudadano fracasa, introduci un sociaal vangnet ta keda importante y ACCION21 lo completa e proceso cu a inicia como parti di landspakket.

DECLARA ASUNTO SOCIAL UN EMERGENCIA NACIONAL

E ta importante pa cuminsa na declara asuntonan social como un emergencia nacional. Esaki kier men inicia un proceso di inventarisacion profundo cuminsando cu leyman hopi anticua cu mester keda adapta of ahusta. Esaki ta inclui un evaluacion di e Social Crisis Plan pa wak unda fondonan a bay y kico ta e resultado. E ta cuminsa cu un nulmeting basa ariba e condicion social cu nos ta reparti den diferente grupo:

- Pre-natal y infantil;
- Mucha;
- Hoben;
- Adolescente;
- Adultonan;
- Pensionadonan;
- Adulto Mayor;
- Personanan cu limitacion;
- Indocumenta.

E enfoke di e nulmeting ta pa por haci un estudio of combina estudionan ya haci den pasado pa por brinda un bista di e situacion actual. Esey lo ta instrumental pa forma un plan di accion integral tumando na cuenta cada un di e gruponan den nos comunidad. E ta importante pa por ta transparente y cuminsa e creacion di nos Social Progress Index. Mientras cu tin un inventarisacion tumando lugar ta un necesidad cuminsa cu un plan di accion inmediato. Ta importante cuminsa na crea un sistema cu ta brinda guia y sosten na cada ciudadano di pais Aruba. Nos kier transforma e nocion di trahado social pa un success coach pa curasha

mas hende den necesidad busca ayudo pa ta exitoso.

CENTRO DI BARIONAN

Nos ta cuminsa inmediatamente cu un plan pa haci uso di locual nos tin caba. Esaki ta pa fortifica e Centro di Barionan, actualmente nos tin nuebe: Oranjestad, Noord, Tanki Leendert, Ayo, Sta. Cruz, Brasil, San Nicolas, Savaneta y Dakota.

Cu reintroduccion di OSEBA por cuminsa na brinda un fondo mas sostenibel na cada centro di bario. Esaki lo prepara nan pa bira e prome instancia di contacto pa sector publico y su respectivo servicionan. Door di un inventarisacion profundo den e barionan lo crea y update un sociale kaart di Aruba cu ta un rapport di tur e retonan social cu tin den e barionan.

Lo studia e posibilidad di expande e infraestructura di e centro di barionan pa por inclui mas servicio y mihor sirbi nan comunidad. Tambe ta importante reconoce cu trahadonan social y opbouwwerkers lo por asisti den brinda un miho servicio di cuidu y sosten mas local na e centro di barionan. Nan lo por p.e. conecta e residentenan cu ayudo publico of asisti nan den busca empleo. Den combinacion cu un sociaal vangnet nos por sigura cu ningun hende keda atras. Usando e centro di barionan, lo construi un banco di data social. Teniendo na cuenta e data social lo desaroya un masterplan a base di principionan di social cohesion intergra cu otro areanan di atencion nacional.

INTRODUCI UN DATABASE SOCIAL

Nos kier introduci un database social unda cu tur informacion importante regardando retonan social ta keda registra den un base di dato central. E instancianan concerni mester por haya acceso pa por añadi y ricibi informacion pa asina ofrece nan clientenan un miho servicio. Asina nos ta percura pa stimula y mehora e cooperacion y lo kier mira acceso comparti cu Departamento di Labor pa ofrece un miho bista di e situacion di cliente. Esey lo facilita miho control si e persona lo mester keda introduci den e social vangnet pa despues wordo reintegra bek den mercado laboral caminda posibel. E database social tambe lo ser usa pa e centro di barionan pa asina duna un bista ariba e sociale kaart di Aruba.

MAMANAN HOBEN - TIENER MOEDERS

Creando un plan integral cu enseñansa ta importante pa por establece un estructura unda mamanan hoben por ricibi e guia y sosten necesario. Den combinacion cu un espacio pa por sigui scol y asina no pone nan enseñansa un banda. Ademas di esaki mester haci un inventarisacion di e tiener moederhuis. Asina nos por haya un miho idea di kico e retonan ta y mas importante kico ta e recursonan cu falta pa por percura cu e sosten necesario keda brinda. Introduci tambe e zorgstructuur pa percura cu e mamanan hoben aki por haya oportunidad den nos comunidad.

PERSONANAN CU LIMITACION

Introduci reglamento cu cada edificio nobo y tur cu ta operacional na Aruba ariba un cierto tamaño mester cumpli cu normanan di e Arbowet pa persona gehandicapt y/of invalido den rolstoel manera:

- Parkeer blauw;
- Rampa;
- Baño cu espacio y infraestructura unda un persona cu limitacion por yuda su mes.

Tambe den caso cu tin un luga cu mas cu un piso mester por tin sea un lift of un lift special pa rolstoel pa asina percura cu e persona cu limitacion tambe por haci su compras y diligencianan.

E ta importante pa nos cuminsa crea un sociedad mas inclusivo mirando cu e comunidad di persona den rolstoel ta sigui aumenta. Pesey nos tin cu cuminsa crea e infraestructura fisico cu ta brinda movilidad pa tur.

RECLASSERING

E ta importante pa desaroya un plan hunto cu Ministerio di Husticia pa haci un inventarisacion di e situacion actual. Nos meta ta pa reduci nivelnan di recidivismo door di crea mas oportunidad pa reintegracion despues di sirbi nan condena. Mirando cu hopi di esnan actualmente encarcela mester di ayudo psiquiatrico, nos kier inverti mas den brinda ayudo pa salud mental. Nos kier expande oportunidadnan di Enseñansa

incluyendo programanan manera EduCampus cu ta permiti estudio individual pa facilita nan reintegracion den sociedad. Empodera esnan encarcela cu herment pa crea un bida nobo ta e miho siguransa cu nan no lo bolbe na comportamiento anti-social of criminal. Sin un alternativo realistico, nos ta condena nan na bolbe ripiti e mesun comportamiento.

ABUSO GENERAL

E ta importante pa fortifica Departamento di Asuntonan Social pa por brinda atencion, ayudo y guia na ciudadanonan cu ta bira victima di abuso verbal y/of fisico inmediatamente. Mester digitalisa e procesonan hudicial pa acumula dato pa maneha e problematica den nos comunidad. E victima semper mester haña prioridad pero un berdadero saneamento ta inclui e agresor tambe. Si e no ricibi ayudo y sosten pa e tambe recupera, e comportamiento lo sigui. Reintegracion den sociedad di un manera sano mester ta e resultado di intervencion.

VIVIENDA SOCIAL

E ta importante pa por sinta cu FCCA y inventarisa e situacion di vivienda social y desaroya un plan structural pa acomoda demanda. Crea mas vivienda, specialmente den centronan di ciudad mester bira un prioridad pa brinda nos hendenan oportunidad di nan mesun cas. Nos lo kier studia con por combina expansion di vivienda social cu

revitalisacion di nos centronan di ciudad door di introduci incentivo pa propietario modifica y dividi nan propiedadnan pero lo expande mas den nos seccion di economia. Futuro desaroyo di nos pais mester tene cuenta sostenibilidad, naturalesa y medio ambiente. Ta importante pa persona cu ta bibando den mondi sin domicilio permanente tambe wordo integra den e social vangnet pa asina cuminsa e proceso di nan reintegracion den sociedad y mercado laboral.

ABUSO SEXUAL

Un tema increíblemente importante cu no a haña su debido atencion. Nos ta kere den bin cu un meldpunt central cu e infraestructura adecua:

- Verhoorkamer;
- Onderzoekskamer.

E facilidad mester inclui herment special pa mucha y traha 24/7 den forma di shift y incorpora:

- Un agente policial;
- Un psicologo;
- Dokter di confiansa (vertrouwensarts);
- Trahado social;
- Asistencia medico capacita pa administra p.e. un rape kit.

Por medio di esaki nos ta crea un ambiente mas sigur ora ta trata mucha y tambe ofrece inmediatamente e guia y sosten necesario. Ta importante pa tambe ofrece guia y sosten a traves di slachtofferhulp na miembro di famia.

Mester entrena mas personal medico den e administracion di rape kits pa por acumula evidencia y asina percura cu e abusadonan wordo cera. Pa combati abuso sexual sigur nos tin cu crea un plan di accion den combinacion cu Ministerio di Husticia y Gemeenschappelijk Hof pa sigura cu nos por garantiza husticia como proceso di saneamento di victima. Na mes momento e ta importante pa crea un plan di tratamiento pa e acusado cu na momento cu e keda encarcela na KIA e por haya ayudo psicologico. Nos kier haci castracion kimico un condicion, pa esnan cu a comete abuso sexual contra menor di edad, pa ser libera despues di a sinta condena pa reduci e probabilidad cu abusadonan bolbe ofende.

Haci un inventario di locual gobierno a introduci caba pa no duplica esfuerzo y evalua si esaki ta un comienso ariba cual por expande. Tambe nos kier introduci un halfway house y mentorship pa asisti hobennan transiciona di Orthopedagogisch Centrum pa bida riba nan mes.

FORTIFICA E VEILIGHEIDSHUIS

Un task force a ser crea y nos ta kere cu e structura aki lo ta uno cu por brinda seguridad despues cu un grupo di diferente departamento sinta cu otro pa hunto crea un plan preventivo pa combati retonan di husticia. Nos ta premira cu conhuntamente lo por reduci e retonan social cu un plan preventivo formula a base di dato comparti cu otro departamento.

BIJSTAND Y ONDERSTAND

Nos ta kere ta importante pa analisa con e sistema ta funciona y con nos lo por implementa un structura mas eficiente y husto. E mision di nos partido ta pa reduci e necesidad pa bijstand y onderstand a traves di un sociaal vangnet cu lo empodera persona pa reintegra den mercado laboral y sociedad di un manera constructivo.

INTRODUCI UN CAS DI DIVERSIDAD (LGBT CENTER)

Nos ta kere ta importante pa desaroya un Cas di Diversidad pa comunidad LGBT. E facilidad lo fungi como un espacio multi-funcional pa brinda recurso na grupo y persona di minoria sexual. E iniciativa lo brinda:

- Un espacio sigur pa persona LGBT por reuni;
- Un plataforma cu ta uni e esfuerzo di e diferente organisacionnan;
- Un shelter pa persona LGBT cu ta enfrentando rechazo na cas, scol y/of misa;
- Ofrece servicionan medico na comunidad LGBT cu personal capacita pa cu nan necesidad particular p.e. incluyendo PrEP; test pa malesa conduci sexualmente; atencion, guia y sosten di salud pa comunidad trans; recursonan pa cuidu di salud mental; number di telefon di sosten 24/7;
- Celebracion anual di Pride;
- Apoyo y guia pa famia gay;
- Enseñasa sexual inclusivo pa hoben

LGBT den scolnan;

- Elimina discriminacion laboral y den vivienda;
- Miembro(nan) di cuerpo policial dedica na abuso, asalto y asunto relaciona cu comunidad LGBT;
- Programa di coscientisa docente y otro persona encarga cu cuidado di mucha y con pa brinda sosten na esnan LGBT y preveni bullying.

LABOR

ACCION21 lo continua cu proyectonan cu a inicia como parti di landspakket incluyendo:

- Realisa un schema pa desempleo;
- Mehora y modernisa procedura pa kita un trahado y derecho;
- Actualisa y modernisa bijstand; Fortifica aplicacion di leyman laboral;
- Fortifica job placement;
- Introduci un arboret;
- Maximalisa compensacion pa kita aduhtonan mayor.

DESAROYA UN CENTRO DI OPORTUNIDAD

Siguiendo ehempel di 'Keith Bell Opportunity Central,' www.theoc.net, nos kier crea un centro di oportunidad den forma di un campus multifuncional cu ta sirbi den progreso profesional, acceso na Enseñansa, participacion comunitario y oportunidad pa tur. ACCION21 su compromiso pa no laga niun hende fracasa ta tuma forma den crea un centro di oportunidad pa

complementa y fortalece recursonan existente y brinda un plataforma pa tur ciudadano por alcanza nan potencial maximo.

INTRODUCI UN ARBOWET

Nos kier introduci un Arboret cu lo tin tres meta principal:

- Salvaguardia e salud di cada empleado;
- Promove bienestar di e empleado;
- Brinda siguridad na e empleado.

Introduci un Arboret ta finalizacion di e dialogo social-laboral tripartiet unda tur partido a acorda cu nan kier mira introduccion di e ley. Esaki lo brinda un estructura cu ta apoya tanto e trahado y e dunado di trabao y ta premira cu su implementacion lo tuma lugad en fase. Pa e trahado y dunado di trabao e lo provee un inventarisacion di riesgo, despues di cual por introduci medidanan pa mitiga e situacion den posibel consulta cu sindicato. Aumenta siguridad na trabao tin bentaha pa ambos trahado y dunado di trabao, e ta reduci malcontento y hisa productividad.

Introduccion di un Arboret lo reemplaza e veiligheidsverordening 1 & 2 cu ta leyman anticua y percira cu Aruba ta cumpli cu normanan internacional di International Labor Organization (ILO). Introduci un Arboret ta trece Aruba den cumplimiento cu acuerdonan C155 y C187 cu ta trata futuro di labor y flexibilizacion laboral y crea oportunidad pa ricibi fondonan di ILO pa su implementacion.

AMPLIACION DE LEY LABORAL CU SECCION PA HOBEN

E ta importante pa nos sigura cu hoben tambe keda protegi, nos kier amplia e arbeidsverordening su articulonan cu ta combati labor di mucha pa por cumpli cu e tratado di derechonan di mucha. Nos ta kere cu estudiante y hoben tambe merece e oportunidad pa por traha y ricibi e experiencia necesario. Actualmente hopi no por keda contrata pa falta di experiencia y kier aumenta e posibilidad pa estudiante por core stage.

SINDICALISMO AUTOMATICO PA TRAHADO DI NEGOSHI GRANDI

ACCION21 ta reconoce e importancia y balor di e trahado. Actualmente hopi trahado no conoce nan derechonan y tin negoshi cu no ta sigui nos leyman existente. Nos ta kere ta importante pa tur trahado di negoshi grandi manera hotelnan ser automaticamente registra como miembro di un sindicato. Trahadonan di negoshinan cu mas cu cien (100) trahado lo mester provee miembresia automatico na un sindicato pa nan trahadonan. Respet pa nos leyman di parti e dunado di trabao como e trahado lo sigura un ambiente di trabao armonioso.

FLEXIBILIDAD LABORAL

Introduccion di e Arbowet y un sociaal vangnet mester sosode prome cu

nos por flexibilisa nos leyman laboral. Actualmente tin un acuerdo bipartiet entre sindicato y gremionan commercial cu ACCION21 lo kier mira implementa. Mirando e escasez di trahado actual, nos ta kere cu mas flexibilizacion laboral ta importante pa brinda mas espacio pa studiantenan, mamanan soltero y otronan traha di e forma cu nan por acomoda. Mas flexibilidad lo empodera mas persona e oportunidad di participa den mercado laboral y reduci e cantidad di persona riba bijstand.

INTRODUCI LEY DI INCLUSION (GEHANDICAPTEN VERORDENING)

Nos kier amplia inclusion pa cada ciudadano por ricibi oportunidad igual pa desaroya nan habilidad y asina alcanza nan potencial maximo. Esaki mester conta tambe pa persona cu limitacion fisico pa nan tambe por ricibi un espacio digno den nos mercado laboral. Introduccion di un gehandicaptent verordening lo preveni discriminacion contra persona cu limitacion fisico of otro limitacion. Tambe ta importante pa garantisa acceso na tur instituto di enseñansa.

INVENTARISACION LABORAL

Nos ta kere ta importante pa haci un inventarisacion di mercado y suministro. Asina nos por percura pa ofrece un miho guia pa estudiante na momento di scoge

nan estudio y futuro carera. Tambe nos kier enfoca ariba persona cu ta sinti nan mes stagna y introduci e concepto di enseñansa continuo lifelong learning. Siglo 21 mester incorpora e posibilidad pa un persona sigui desaroya su mes continuamente y logra su potencial maximo. Introduccion di bijscholing y herscholing lo sigura cu cada ciudadano por mehora su preparacion profesional y existencia di un sociaal vagnet lo facilita nan recapacitacion. Tambe nos kier studia e posibilidad di ofrece reconocemento di proficiencia segun experiencia.

REDUCI MERCADO INFORMAL

Ta importante pa reduci e mercado informal pa salvaguardia derecho di tur trahado. E cantidad grandi di trahado den mercado informal ta afecta nos Arubanonan di menos recurso mas severamente. Trahadonan local no por competi cu un persona dispuesto pa traha pa menos cu salario minimo. Den nos seccion Ministerio di Husticia nos ta propone solucionnan pa trata mercado informal laboral y especificamente trahado indocumenta. Tambe nos kier mira mas entrenamiento di trahado local y un inventarisacion di con DPL ta otorga aprobacion pa asina crea mas incentivo pa entrena nos mesun hende nan.

OULDERSCHAPSVERLOF

Den nos seccion Parlamento di Aruba, un di e leyman pendiente pa aprobacion

di ACCION21 ta un expansion di ouderschapsverlof (liber pa embarazo y mayornan nobo) cu ta trece nos leyman pa mayornan nobo den concordancia cu Hulanda y BES. Ta importante pa Aruba keda na vanguardia di avancen den derecho di trahado y nos ta comprometi cu sigui modernisa nos leyman pa e trahado Arubano no keda atras. Nos concepto di ley ta inclui e siguiente cambianan:

- Extende liber pa mamanan nobo di 12 pa 16 siman;
- Reduci e tempo di notificacion cu un empleado embarasa mester duna su dunado di trabao pa liber prome cu nacemento pa 6 siman luga di dos luna actualmente;
- Si un baby wordo hospitalisa durante e periodo di liber, e dianan hospitalisa no ta conta den dianan liber;
- Si e mama fayece durante parto, su tempo liber ta pasa pa su casa/pareha of e persona cu tabata biba cu e mama of cu a reconoce e baby como di nan;
- Liber pa tata ta subi for di 2 dia te cu 5 dia pa parehanan registra y personanan cu ta bibando cu e mama, of persona cu a reconoce e baby como di nan;
- Tatanan/parehanan ta haya oportunidad pa tuma cinco (5) siman adicional liber durante e prome seis lunanan despues di nacemento cu setena (70) porciento di nan salario.

UNIVERSAL BASIC INCOME (UBI)

Automatisacion lo reemplaza mita di nos trabaonan pa 2050. E modelo socio-economico di ultimo siglonan cu bo mester un trabao pa sobrevivi y hiba un bida digno no lo ta posibel mas pa tur hende den e decadanan nos dilanti. Ta importante pa nos cuminsa prepara den ofrece nos ciudadanonan un universal basic income. Nos vision a largo plasota pa garantiza sobrevivencia di tur ciudadano door di un universal basic income. Esaki lo cambia e relacion entre e dunado di trabao y empleado. Si su sobrevivencia basico ta garantiza pa estado, e dunado di trabao lo mester motiva e trahado pa drenta mercado laboral. Preparacion pa un futuro cu no lo tin trabao pa tur hende mester cuminsa awor cu creacion di un fundeshi pa den futuro ofrece tur Arubano un entrada basico universal.

CULTURA Y DEPORTE - YABINAN PA UN ARUBA SANO Y SOSTENIBEL

Cultura y Deporte ta dos instrumento cardinal cu por ser uza pa e desaroyo di un ser humano desde infancia te adulto mayor. Nan ta aporta na e formacion personal di cada ciudadano y ta crea e identidad di un pais.

Cada ciudadano mester tin e oportunidad maximo pa por studia y eherce esakinan y tin e posibilidad pa por engrandecenan mes riba e terenonan aki.

Cultura y Deporte especialmente ta dos

area hopi importante pa e formacion di hubentud di bo pais y alabes por aporta na un miho calidad di bida pa sernan di 60+ aña.

Cultura y Deporte no ta sectornan cu ta para ribanan mes. Pa un bon maneho, uzo y desaroyo di esakinan ta imperativo pa tin un maneho integral, inter-ministerial y inter-departamental, ya cu nan ta alabes directamente liga na Salubridad Publico, Enseñansa, Infraestructura y e desaroyo Socio-Economico di un pais. Den e programa di partido di ACCION21 nan tin un rol den cada un di e sectornan ariba menciona.

Den e vision y mision di Deporte y Cultura mester tene cuenta cu Aruba ta un Small Island Developing State (SIDS) y semper mester ta positivamente liga na metanan di desaroyo sostenibel.

CULTURA

Cultura ta un area hopi subestima den politica. Un dje motibonan ta cu cultura no ta ser bon comprendi. Aunke tin hopi diferente forma con a trata di describi kico cultura ta, p.e.:

“Cultura ta e caracteristicanan y conocimiento particular di un grupo di persona, incluyendo idioma, religion, cushina (gastronomia), custumbenan social, musica y artenan.”

E definicion di UNESCO (2001) ta:

“Cultura ta un set di diferente característica spiritual, material, intelectual y emocional di un grupo social cu ta inclui no solamente arte y literatura, pero formanan di biba, formanan di biba hunto, sistemanan di (norma y) balor, tradicion y creencia”.

E palabra cultura ta bin di e palabra Latino “colere”, locual ta ser defini como “cultiva” y “tendencia”: “e tendencia pa cuida e tera (planeta/mundo) y crece, of cultiva y aprecia”.

BENEFICIONAN SOCIO-ECONOMICO

Cultura ta provee beneficinan social y economico importante. Cu miho prestacion di studia y di salud, un aumento di tolerancia y oportunidad pa uni cu otronan, Cultura ta engrandece nos calidad di bida y ta incrementa e bienestar general di ambos e ser individual y comunidad.

Alabes Cultura ta influencia nos creencia relaciona cu kico ta corecto y incorreto, nos actitud incluyendo kico nos ta gusta y kico no, nos balornan REGARDANDO kico ta bon y malo, y nos comportacion. Di e influencia cultural aki, nos identidad ta ser forma.

Si pa logra sostenibilidad ta primordialmente haci uzo di e recursonan di nos planeta, cultura mester ta central den nos strategianan di desaroyo, ya cu culturanan ta marca relacionan

humano cu otronan den sociedad y e mundo na nan alrededor, incluyendo e ambiente natural y ta condiciona nan comportacion. Ademas, como sectornan di actividad, patrimonio y industrianan creativo ta contribui significativamente: desde “trabounan berde” y patronchinan di consumo y produccion mas sostenibel, hasta comunidadnan resiliente cu ta capaz pa confronta desastrenan miho y tin acceso na awa y e alimentonan, reduciendo e desekilibrio y pobresa den e regionnan y fortaleciendo e sostenibilidad.

MANEHO INTEGRAL Y SOSTENIBEL

- Cultural Governance Code¹
- Inter-ministerial
- Inter-departamental
- Multi-disciplinario

Ta importante pa implementa e Cultural Governance Code (i.e. Corporate Governance Code) na e institucionnan subsidia pa gobierno, cual ta trata e maneho y control interno riba esaki y responsabiliza plan y actividad (checks and balances).

Mescos cu Deporte, cultura tin di haber cu diferente sector y area di Aruba, cual ta rekeri un maneho integral (conhunto).

Riba nivel gubernamental, cultura, mescos cu deporte, mester forma parti di un maneho inter-ministerial riba un nivel multi-disciplinario pa por yega

¹ Cultural Governance, Kwaliteit van Bestuur en Toezicht in de Culturele Sector, Stichting Kunst en Zaken (2000)

na un calidad progresivo maximo di e ramo aki, ya cu tin diferente ministerio, departamento y disciplina involvi.

PRESERVACION DI NOS PATRIMONIO CULTURAL Y NATURAL

- Legislacion
- Conservacion
- Documentacion y Estudio
- Educacion/Conscientisacion di nos Herencia Cultural
- Promocion

Cultura ta e fundeshi di un sociedad. E fundeshi mester ta solido y na Aruba nos herencia cultural ta carece masha hopi di legislacion adecua. Hopi ley ta anticua of simplemente no tin ley. Pa e fundeshi por ta solido, mester update leynan anticua y percura pa tin legislacion unda cu falta. Aruba ta miembro di tratadonan internacional, pero hopi biaha no tin ley di implementacion na nos isla. Den extremo por yega na un “Ley General di Cultura” den cual tur e diferente areanan cultural ta protehi (e.g. Ley General De Cultura di Colombia unda cultura a ser reconoci como e wortel/rais, e base of razon di e nacion Colombiano). DWJZ² ta crucial den esaki.

Conservacion di nos patrimonio cultural y natural ta sumamente importante y mester ser trata adecuadamente. Nos tin e parti di nos herencia cultural tangibel (material), cu ta encera nos herencia cultural movibel (pintura, escultura, moneda, manuscrito), nos herencia inmovibel (monumento, sitionan arkeologico etc.), nos herencia subacuatico (naufragio/wrak, ruinan bou awa etc.) y nos tin e parti di nos herencia cultural intangibel (inmaterial) cu ta regarda nos tradicionnan oral, performing arts, ritualnan etc. Nos patrimonio natural ta encera sitionan natural cu aspectonan cultural (paisahe cultural), formacionnan fisico, biologico of geologico.

Ta importante pa nos herencia cultural ser documenta y studia. Ambos GO's³ y NGO's⁴ cu ta traha riba tereno cultural of tin di haber cu esaki, mester ser stimula y sosteni. DCA⁵ na Aruba ta crucial den esaki, banda di MANA⁶, ANA⁷, BNA⁸, UA⁹ y otronan.

Ta importante pa educa y conscientisa nos pueblo di e importancia di nos herencia cultural. Esaki ambos por medio di educacion formal y informal.

2 Directie Wetgeving en Juridische Zaken

3 Government Organization

4 Non-Government Organization

5 Directie Cultuur Aruba

6 Museo Arqueologico Nacional Aruba

7 Archivo Nacional Aruba

8 Biblioteca Nacional Aruba

9 Universidad di Aruba

Nos herencia cultural mester ser promoviden tur sentido di palabra pa fortificanos identidad unico como Arubiano.

PAPIAMENTO

- Rol Central di Papiamento
- “Camber di Papiamento”

Boidiomata fundamental pa boidentidad cultural. Ora un idioma desaparece, e cultura ta muri. Idioma ta un dje partinan mas importante di cultura. E ta e forma con bo ta comunica cu otro, construi relacionnan y ta crea un sentimento di comunidad. Papia, skirbi y lesa ta partinan integral di bida diario, unda idioma ta e instrumento primordial pa expresa y comunica. Aunke Papiamento ta existi pa mas di 300 aña y na Aruba desde 1976 e tin su ortografia, desde 2009 su vocabulario oficial y desde 2010 e tin su manual di gramatica (morfologia). Papiamento mester tin un rol central na Aruba y mester conscientisa e Arubano y stranhero pa su uzo corecto.

Idiomanan ta dinamico y ta cambia durante tempo. Na diferente pais tin linguista cu ta dedica nan mes na cambianan den uzo di idioma y cada pasa tanto aña (dos aña na Hulanda) ta publica tur cambio oficial den su uzo. Ta imperativo pa na Aruba bin un “Camber di Papiamento” cu ta enfoca pa studia

nos idioma y percura pa e influencia- y cambianan ser oficialisa y haci publico pa nos idioma ser uza corectamente.

CULTURA Y ENSEÑANSA

- Educacion Cultural den Curiculo Escolar
- Educacion Cultural den Tra’i Merdia/ Actividadnan Extra Curricular
- Cultura den Centronan di Bario
- Estudio den Ramo Cultural
- Rietveld Academie

Por medio di educacion cultura ta ser comunica na un mucha/hoben, door di cual e ta custumbra cu tradicion, custumber, balor y patronchi di comportacion cu ta reina den su grupo. E conocimiento aki ta permiti’e pa adapta na su alrededor social pa asina e por logra su socializacion. Educacion ta hunga un rol crucial den transmision di cultura; esaki ta ser logra ora preservacion ta ser haci di un generacion pa un siguiente. Cultura por ser desaroya via Enseñansa. Educacion ta trece e cambio desea den ambos e balornan cultural pa progreso y desaroyo di un sociedad.

E teoria di Multiple Intelligences¹⁰ (Howard Gardner [Harvard Professor], 1988) ta diferencia e inteligencia humano den “modalidadnan di inteligencia” specifico, na luga di defini inteligencia como un solo habilidad en general. Un

¹⁰ Inteligencianan Musical-ritmico y harmonica, Visual-espacial, Linguistico-verbal, Logico-matematico, Corporal-kinestesico, Interpersonal, Naturalista, Existencial, inteligencia adicional (inteligencia docente-pedagogico y inteligencia digital).

dje areanan defini ta Musica (expresion cultural), cu ta e area di inteligencia cu sensibilidad pa zonido, ritmo y tono di musica. E personanan cu inteligencia musical normalmente tin un bon tono of por posee un tono absoluto y tin e capacidad pa canta, toca instrumento musical y compone musica. Nan tin e.o. sensibilidad pa ritmo, tono y melodia. Musica como un dje actividadnan cultural ta sumamente importante pa ta den Enseñansa.

E funcion di Centronan di Bario mester ser restaura unda ciudadanonan di tur edad y sexo por participa na actividadnan cultural.

E sector cultural falta hopi specialista den e ramo aki, pa cual motibo ta importante pa stimula studiantenan pa escohe un carera den e ramo aki (profesionalisacion). Importante ta pa tin un bista riba e vacaturanan/profesionnan cultural necesario actualmente, como tambe ki nivel di estudio secundario mester pa esakinan.

Rietveld Academie tabatin un impacto positivo pa Aruba y studiantenan interesa den un estudio cultural unda na Aruba mes nan por a haci (parti) dje estudio aki. Esaki tambe dentro di e contexto di desaroya e Knowledge Economy como catalisado pa desaroyo socio-economico den e “Sistema di Innovacion” na Aruba.

FONDONAN

- Gobierno/GO's (incluyendo DCA)
- Fundacionnan (e.o. UNOCA, Prins Bernhard Fonds)
- Crea un Fondo Cultural
- Engrandece Participacion di Sector Priva

Parti di e fondonan pa cultura ta bin di gobierno. DCA (GO) tambe tin cierto fondo cu por ser uza cu un peticion adecua y segun cierto criterio. Semper cultura su porcentahe riba nos presupuesto nacional tabata hopi abou. Algun año pasa e tabata 0.6% y lo ta bon pa sondea e posibilidad pa hisa esaki cu p.e. 1%.

Tin diferente fundacion cu ta subsidia proyectonan cultural, pero no ta facil pa logra esaki, como cu pa skirbi un peticion ta rekeri cierto conocimiento cu por forma un obstaculo, mientras cu tin basta actor den e mundo cultural cu ta trata di haya subsidio of sosten financiero dje mesun fondonan limita.

Den pasado a pensa pa crea un “Fondo Cultural.” Mas di 10 año pasa a pensa riba e posibilidad pa LOTTO aporta cu un cierto suma (“LOTTO pa Cultura”), mientras cu recientemente un idea tabata pa designa \$1 di e tax di entrada (turistanan crucero) pa cultura. Lo ta bon pa sondea si tin posibilidad pa por crea mas fondo pa cultura.

Den e sector cultural semper pa yega

na fondo ta forma un reto. Involucrando e sector priva mas activo den e mundo cultural y proyectonan cultural (creativo), por crea un synergy entre e dos sectornan aki unda cu por cristalisa sosten financiero pa proyectonan cultural.

CULTURA Y DESARROYO ECONOMICO

- Cultural and Creative Industry (+ Knowledge Economy + Innovacion)¹¹
- Nation building
- Nation branding
- Producto Turistico
- Crea Experiencia Cultural
- Turista Cultural
- “Capital Cultural di Aruba – San Nicolas”
- Pilot Project CCI

Diversificando e economia Arubano desaroyando un Cultural & Creative Industry (CCI) (Industria Cultural y Creativo), ta toca temanan manera crea cupo di trabou, preservacion sostenibel di nos herencia y cohesion social. Pa prome biaha CCI por crea cohesion den desaroyo socio-economico di nos isla basa riba e aceptacion genuino di un identidad cultural inclusivo. E lo por inicia miho comprendemento pa e necesidad pa rehobenecemento cultural tumando e contexto multicultural Arubano na cuenta. Lo ta e prome “industria” cu lo

genera entrada, mientras ta atende cambionan social den e economia Arubano. Den e situacion financiero y social actual di Aruba, cu e desaroyo di e CCI, nos isla por ta sigur cu esaki lo aporta positivamente na un desaroyo sostenibel pa nos sociedad, incluyendo tur ciudadano. Cultura y Creatividad mester ta e curason di nos desaroyo sostenibel.

Nation Building ta e proceso activo elaborando un identidad nacional cu simultaneamente ta reconoce ambos e diversidad cultural y “sincretismo”. Ta importante pa reconoce tur nacion na Aruba (Aruba globalisa: mas di 100 nacionalidad) unda cultura ta hunga un rol cardinal. Na nos isla nos herencia indigena ta central den e proceso aki, aunke na prome bista esaki no ta visibel.

Nation Branding ta enfoca riba midi, construi y maneha e reputacion di un pais. E ta e aplicacion di concepto- y tecnicanan di mercadeo corporativo pa otro pais, cu e meta pa mehora su reputacion den relacionnan internacional. Hopi biaha e meta ta pa crea relacionnan entre actornan cu no ta limita na nacion. E ta extende pa e sectornan publico y priva y ta yuda cu nacionalismo. Alabes nan kier participa na proyectonan multi-lateral. Un forma

¹¹ E necesidad pa reconoce e rol di innovacion, conocimiento y creatividad pa expande potencial economico pa desaroyo socio-economico sostenibel ta inevitabel. Aruba tin un Creative Industry poco desaroya y ainda esaki no ta stabil, locual ta haci'e dificil pa wak e synergy entre e Creatividad, Conocemento y Innovacion (Creativity, Knowledge and Innovation). Pa e motibo aki ta importante pa stimula e synergy aki acelerando innovacion na Aruba den tur nivel durante e siguiente añanan. Esaki ta inclui atencion na areanan manera Educacion, Strategianan di Innovacion Nacional, desaroyo di Derecho di Propiedad Intelectual y Inversion Stranheria Directo, creando un ambiente economico apto pa e economianan aki, reforsando e espirito empresarial (entrepreneurship), e talento y desaroyo di habilidadnan y innovacion social.

ta incrementa e importancia di e balor simbolico di productonan cu ta enfatisa e caracteristicanan unico di un pais y ta mesun importante cu locual nan ta produci y bende realmente (country of origin effect). E imagen y reputacion di un pais por dramaticamente influencia su vitalidad economico. Nan ta trata di atrae turismo y capital di inversion, incrementa exportacion, atrae un forsa laboral talentoso y creativo, y mehora su influencia cultural y politico den mundo. Na Aruba nos iconografia di biyete bancario (moneda), nos herencia indigena, idioma y Parke Nacional ta caracteristicanan unico di nos pais cu por y ta ser uza pa e meta di Nation Branding.

Nos potencial cultural ta sumamente grandi, no solamente pa su indole unico, pero tambe pa e creatividad Arubano y alabes diversidad cultural di nos isla. E producto turistico aki no ta completo sin cu e bishitante (incluyendo e propio Arubano) por experiencia cu tur su 5 sentinan na un forma personal con unico e cultura di nos pais ta.

Aruba por bira un centro cultural den Caribe uzando e.o. Nation Branding y percurando pa trece eventonan cultural di importancia na nos isla. Ta comproba cu leisure tourists di Norte America cu ta participa na actividadnan cultural Arubano of di nos herencia, di averahe ta gasta 63% mas cu otro leisure tourists.

A cuminsa un desaroyo pa haci di San Nicolas e “Capital Cultural di Aruba”. E idea aki no tabata malo y lo ta importante pa finalisa y/of sigui cu e desaroyo aki, teniendo na cuenta cu e CCI lo aporta na e desaroyo socio-economico di San Nicolas.

Lo bin cu un Pilot Project CCI pa por yuda un 600 artista cu tin problema pa por traha of haya trabou den un forma similar na FASE. Akinan por ricibi un suma mensualmente, bou di e condicion cu pa luna ta crea un obra di arte cu lo ser evalua pa un Quality Control Committee. Lo huur e obranan na empresanan cu lo expone esakinan.

DUNA BALOR NA NOS PASADO Y NOS DIVERSIDAD CULTURAL

Ta duna prioridad na:

- Logra pone Aruba riba e Lista di Patrimonio Mundial (World Heritage List -y fiha sitio(nan) di Consenshi segun criterianan di UNESCO;
- Promove mas conocimiento di y duna sosten na cultura y deporte di Aruba;
- Reconoce diversidad di culturanan na Aruba y promove inclusion di cada habitante.

E enfoke riba e 3 puntonan indica aki riba ta promove construccion di un nacion (nation building) y desaroya Aruba como marca (nation branding).

Pa traha pa un futuro sostenibel y duradero di Aruba, conocimiento di e

efecto material y mental di ‘Colonialismo’ ta instrumental. Den dominio colonial e efectonan di sclavitud indigena y sclavitud Transatlantico ainda ta presente den nos comunidad, Caribe y otro parti di mundo.

Un parti importante pa Nation Branding, pa nos producto Arubano y pa nos propio identidad, ta pa cierto aspecto di nos herencia material y inmaterial por ser reconoci pa UNESCO. Ciertu aspecto di nan tin un balor universal y una bes acepta, e lo ser poni riba e asina yama World Heritage List cu ta un boost enorme pa e cohesion socio-economico y identidad di nos pais. Den pasado a trata di yega na esaki, pero no a entrega e petitionnan na e forma mas fuerte, pero sigur p.e. cierto area cu sitionan di Dibuhonan/Pinturanan Riba Baranca (un parti importante di nos prehistoria y patrimonio cultural arkeologico), tin tur característica pa por ser poni riba e World Heritage List.

Ta sumamente importante pa pone atencion na e aspecto di ‘Colonialismo’. E ultimo dos pa tres aña, den Reino tin un ‘hype’ relaciona cu e tema di sclavitud. Esaki tin hopi di haber cu e sclavitud transatlantico (Afro-Caribense), mientras cu no por lubida cu tambe tabata existi sclavitud indigena.

Relaciona cu esakinan, ta importante pa educa tocante colonialismo, en especial cierto tema y nificacion di terminologia, p.e. colonialismo, post-colonialismo, neo-colonialismo, decolonizacion, rectificacion, apropiacion y Eurocentrismo.

Durante e historia humano di Aruba cu ta encera 3.500 aña, hende di diferente pais a impacta nos isla, pero mayoria a ser lubida. Atencion mas tanto ta bay pa nos historia recién (despues di 1900). Un ehempel ta Andres Tromp, e prome fiscal di Misa Santa Ana (1777/1778), cu tabata alabes e Capitan dje Indjannan Arubano y a encabesa e prome revolucion indigena contra e opresonan Europeo na 1795. Un estatua/monumento pa reconoce e personahe aki ta hopi importante pa demarca e suceso historico aki, pa conscientisa Aruba di nos pasado y pa fortifica nos identidad (otro ta p.e. Virginia Dementricia cu ta e esclavo mas rebelde den nos historia).

Pa logra esaki, ta importante pa usa e concepto di creacion di Sitionan di Consenshi (Sites of Conscience¹²) segun e International Coalition of Sites of Conscience (ICSC)¹³. Esaki entre otro lo engrandece e esfuersonan di nation-building y nation-branding di Aruba, den un intento pa altera e ‘Narativanan

12 Esakina ta p.e. museo, sitio historico, memorial, of iniciativa di memoria cu ta confronta ambos e historia cu a pasa y su legadonan contemporaneo. E sitionan aki ta interpreta historia mediante un sitio, ta involucra publico den programanan cu ta stimula dialogo riba temanan social cu ta pressing, comparti oportunidad pa publico participa y e accion positivo relaciona cu e temanan plantea na e sitio, y alabes promove husticia y culturanan universal di derechonan humano. Sitionan di Consenshi ta enfrenta tur aspecto di nos historia, esta historianan di gran crueldad, gran corahe y bida diario, y ta activa e perspectiva historico cu un dialogo publico dinamico relaciona cu temanan similar cu nos ta enfrenta awendia y kico por ser haci al respecto.

13 <https://www.sitesofconscience.org/>

Grandi” di colonialismo Europeo. Meta tambe ta pa mira con y pakico Sitionan di Consenshi di Aruba lo por bira miembro di e ICSC.

Un otro parti importante pa Nation Building ta pa crea sincretismo entre e diverso culturanan unda nan ta incluso den nos identidad actual, reconociendo nan aporte na nos cultura y dunando nan e homenahe cu nan merece.

DEPORTE

Deporte hopi biaha tin un posicion clave riba agenda personal di hopi persona, pero tambe riba esun social. Riba nivel personal e ta liga cu emocion y ta un guia importante den bida. Deporte tambe tin un balor social. E ta percura pa integracion y socialisacion y por refleha proporcion/relacion social. Alabes e ta duna hobennan e posibilidad pa haya nan caminda den un sociedad. E ta crea un network, confiansa den su mes y den otronan, locual ta conduci na un capital social, ambos riba nivel individual como tambe riba nivel social. Tur miembro di nos sociedad, di mucha te na esnan riba 60 aña, mester por tin e oportunidad pa por practica deporte.

AREANAN DI ATENCION: PIRAMIDE DEPORTIVO

- Deportenan Masivo
- Deportenan Recreativo
- Deportenan Escolar (wak punto H)
- Topsport/Elite (wak punto I)

Ta importante pa stimula/motiva, promociona, engrandece y enrikece tur e diferente areanan deportivo di e Piramide Deportivo.

Alabes mester crea conscientisacion di e importancia cu deporte tin relaciona cu nos salud, ambos fisico y mental.

IBISA¹⁴ mester tin un rol central den esaki.

Federacionnan, ambos miembro y no-miembro di sea Aruba Sport Unie (ASU¹⁵) of Comite Olimpico Aruba (COA¹⁶), mester por haya e sosten maximo pa por desaroya e practica di nan deportenan.

GRUPONAN DI ENFOKE

- Tur Edad
- Tur Sexo
- Tur Deporte na Aruba

Esaki ta inclui nos deportistanan cu limitacionnan fisico y/of mental.

Un grupo cu mester di atencion special

14 Instituto Biba Saludabel y Activo

15 Aruba Sport Unie

16 Comite Olimpico Aruba

ta esun di 60+, cu pa e estado fisico y mental ta hopi importante pa por tin acceso na practica deporte y cu esaki ta ser brinda na nan.

Esaki nifica tur deporte existente na Aruba, sea cu e deporte ta reconoci of no pa Comite Olimpico Internacional, ta miembro di ASU y COA (sportvereniging), pero tambe esnan cu no ta afilia na esakinan (p.e. fundacionnan cu no a ser acepta ainda of ta recreativo y hasta competitivo, pero cu no por of no ta interesa pa ta miembro di ASU of COA);

E deportenan por ser dividi den esnan cu ta ser practica den forma “individual” y esnan cu ta ser practica den “conhunto”. E practica di ambos tipo di deporte tin beneficio specifico den e desaroyo y bida di un individuo; Alabes e deportenan por ser dividi den esnan Fisico y esnan Mental.

PROFESIONALISACION SECTOR DEPORTIVO

- Capacitacion/upgrading Dirigentenan Deportivo
- Estudio pa Deporte como Profesion

Ta importante pa capacita mas dirigente deportivo (p.e entrenador, arbitro, scorer, ehecutivo) posibel relaciona cu e diferente deportenan dje Piramide Deportivo. Hopi biaha ta trata di boluntarionan cu ta traha duro, pero falta conocimiento deportivo, teoretico y didactico/pedagogico.

Mester stimula pa involucra y recluta boluntario, ya cu hopi biaha tin escasez di dirigente.

Formacion di “agentenan” deportivo pa guia deportista di “alto rendimiento” ta un area cu poco interes a haya den pasado, pero e ultimo añanan mas y mas hoben ta hayando oportunidad pa studia cu beca of tin potencial y mester di haya guia adecua.

Banda di por haya un carrera profesional como deportista, esaki tambe por como docente deportivo (gymleraar).

FACILIDADNAN DEPORTIVO

- Facilidadnan Deportivo y Unda por Entrena (includi edificio, tereno, club y aire liber)
- Complehonan di Federacionnan (incluyendo particular/priva)
- Complehonan Deportivo Maneha pa FFD¹⁷
- Centronan di Bario
- YMCA

E calidad di facilidadnan deportivo mester atencion continuo. Facilidadnan deportivo mester di mantencion, ekipo di entreno y upgrading. Esakinan mayoria biaha ta depende di subsidio (via ASU, COA, Ministerio di Deporte, fondonan internacional y fundraising), mientras un parti ta cay bou maneho di FFD.

E funcion di Centronan di Bario mester ser restaura unda ciudadanonan di tur edad y sexo por practica deporte.

Tin dos YMCA (fundacion) cu ta brinda diferente actividad deportivo y ta importante pa sostene y promove nan unda cu por.

No tin un Centro di Deportenan Mental na Aruba, aunke clubnan ta existi, pero mester carga gastonan di huur y no semper tin lugha adecua pa esakinan. Centronan di Bario den pasado tabata ser uza pa e deportenan aki, pero no ta un lugha a largo plazo cu ta duna siguridad pa por sigui practica.

Crea canchanan deportivo den nos barionan di p.e. mini-futbol, mini-baseball, beach tennis. Tin algun cu via fondonan di organisacionnan internacional a ser subsidia.

FONDO/SUBSIDIO

- LOTTO (via ASU y COA)
- Crea un Fondo pa Deporte
- Stimula Sector Priva pa ta Involucra cu Deporte

Tin hopi aña caba cu e Fundacion LOTTO pa Deporte tin problema interno y hopi metemento di politica cu no ta beneficia e mundo deportivo. Lo ta importante pa trata di renegocia na un forma diplomatico pa LOTTO ser sana y fungi segun e Code Corporate Governance.

Den pasado diferente partido politico a vocifera cu kier crea un Fondo pa Deporte, cual te awe no a sosode. Ta importante pa sondea e posibilidad aki cu por aporta grandemente na mehora nos pais uzando deporte como instrumento (den pasado tabatin e idea pa fiha un porcentahe di e casino drop tax pa un “Fondo pa Deporte”).

Placa semper ta un reto den deporte y ta importante pa involucra e sector priva activamente den eventonan/ actividadnan deportivo, ambos riba nivel nacional y internacional. Esaki ta beneficioso pa e deportista, como tambe pa e sector priva.

DEPORTE Y DESARROYO ECONOMICO

- Nation Building
- Nation Branding
- Centro/Hub Deportivo den Caribe

E sentimento di nacionalismo ta directamente liga na Nation Building. Banda di religion, deporte ta e unico “hilo” cu ta uni hende y ta yuda desaroya e sentimento di patriotismo y unidad. E ta construi y defini e caracter di un nacion y ta yuda cualidadnan manera disciplina, determinacion, teamwork y un pasion pa fitness den e psyche (“totalidad di e mente humano”) di un nacion. E ta yuda guia e hubentud den e direccion adecua, ta yuda den construi infraestructura y ta crea un comunidad global.

Nation Branding ta un proceso unda e imagen di un pais por ser crea, monitoria, evalua y proactivamente maneha pa mehora of engrandece e reputacion di un pais na un publico (di enfoke) internacional. Esaki por ta un reto pa paisnan den desaroyo (p.e. SIDS). Deporte ta ser mira como un instrumento pa Nation Branding. Esaki especialmente pa deportenan den cual e pais ta resalta y ta saca bon resultado. E por bira e imagen di un pais, sea un deporte specifico, of (un) individuo(nan) cu ta resalta internacionalmente den un ramo di deporte.

Aruba tin e infraestructura presente pa por organisa eventonan deportivo grandi (proyectonan innovativo y hasta Mega-Events) cu por aporta na nos desaroyo economico (e.o. turismo) y na e concepto di Nation Branding. Aruba tin un bentaha grandi riba otro paisnan den Caribe relaciona cu su accesibilidad aereo facil, un clima favorabel henter aña, criminalidad abou, y estabilidad politico.

DEPORTE Y SALUBRIDAD PUBLICO

- Curpa (fisico) sano
- Mente sano
- Nutricion

Deportenan fisico tin un influencia directo riba salud fisico di e ser humano. (p.e. nan ta combati enfermedadnan cronico).

Deportenan mental tin un influencia grandi riba bo desaroyo cognitivo cu

ta preveni y alivia cierto malesa (p.e. demencia, ADD/ADHD, depresion y adiccion).

Deportistanan en general tin bon bista riba nan nutricion, aunke tin un diferencia entre deportenan fisico y mental, mientras hopi biaha e disciplina dietario ta liga na si bo ta practica un deporte riba nivel recreacional of competitivo.

DEPORTE Y ENSEÑANSA

- Curiculo
- Tra'i merdia/Actividadnan Extra Curricular
- Olimpiada Escolar
- Estudio pa Deporte como Profesion

Deporte mester tin un luga importante den programa y curiculo di scolnan basico y secundario pa motibonan trata den e puntonan anterior. Parce cu no ta semper gymleraartaduna gymnastiekles y alabes un cantidad substantial di scol na Aruba no tin un edificio/area adecua pa haci gym (deporte). Ta importante pa esakinan ta presente y pa hendenan capacita guia e hobennan riba tereno deportivo y pa e ramo aki haya e luga cu e merece den nos sistema di enseñansa.

Dentrai'i merdia deporte ta ser duna, pero no ta prominente den su programanan y alabes no semper ta ser duna pa especialista di deporte – actividadnan extra curricular tin deporte inclui.

Olimpiada Escolar ta importante pa keda den programa anual di enseñansa. Lo ta

interesante si por rebiba e torneonan inter-insular entre e campeonan di e islanan di Reino Hulandes Caribense.

CENTRO DI ALTO RENDIMIENTO – TOPSPORT

- Compleho Multi-Funcional
- Acuerdo cu Scol
- Acuerdo cu Trabou
- Acuerdo cu Mundo Medico (Salubridad Publico)

Aruba tin un gran potencial den hopi deporte unda talentonan grandi a demonstra esaki riba nivel internacional, sigur durante e ultimo 10 aña. Lamentablemente den nos sistema escolar deporte no tin e luga prominente cu e tin na otro pais. Tampoco ta existi un structura permanente cu ta duna e talentonan aki e posibilidad di ser guia den un forma profesional pa yega nan top. Mayoría pais tin asina yama “Centronan di Alto Rendimiento” unda segun e criterio dje pais, cierto deporte y deportista ta ser selecciona y ta cay den un programa di Alto Rendimiento. Hopi biaha e Centro di Alto Rendimiento ta ubica den un compleho multi-funcional y aunke na Aruba no tin uno moderno suficiente grandi, si tin un infraestructura existente cu por ser uza pa un programa pa atletanan di alto rendimiento.

Pa talentonan/deporstistanan di Alto Rendimiento por eherce nan deporte na un forma profesional, mester tin

e espacio y tempo pa por haci esaki debidamente. Por medio di acuerdonan cu scol y trabou, por brinda e espacio aki unda na un forma adapta, por eherce deporte y alabes sigui scol y/of trabou.

Acuerdonan cu e mundo medico (Salubridad Publico) ta importante pa asina e deportista por tin guia y tratamiento adecua relaciona cu e deporte cu e ta eherce.

Diferente partido politico den pasado a papia di e tema aki, incluyendo pa aloca fondonan pa por duna beca na deportistanan cu hopi potencial, pero esaki nunca a cristalisa. Regularmente deportistanan Arubano di diferente ramo di deporte ta haya beca pa bay studia, pero esaki ta ser duna pa e College of Universidad na cual e persona aki ta bay studia.

Tin hopi evento nacional y internacional na cual nos talentonan mas grandi por competi y cualnan ta ser subsidia pa LOTTO pa Deporte. Un evento internacional cu ta ser subsidia pa gobierno ta e Weganan di Reino cu pa hopi aña a fungi como un plataforma di indole internacional y ta importante pa sigui organisa nan, ya cu un tempo a cancela esaki.

MANEHO INTEGRAL Y SOSTENIBEL

- Corporate Governance Code
- Inter-Ministerial
- Multi-Disciplinario

Como cu deporte ta un ramo cu tin di haber cu diferente area y sector di nos isla, mester maneha esaki di un forma integral (conhunto).

Den pasado ambos GO's y NGO's ta ser uza negativamente pa politico, a conoce interferencia politico of ta carece di profesionalismo den nan organisacion of departemanto. Pa e motibo aki ta hopi importante pa nan cumpli cu e Corporate Governance Code.

Riba nivel gubernamental, deporte mester forma parti di un maneho inter-ministerial riba un nivel multi-disciplinario pa por yega na un calidad progresivo maximo di e ramo aki, ya cu tin diferente ministerio, departamento y disciplina (profesion) involvi.

ACCION 21 
PLAN DI
PARTIDO
2025 - 2029

#BanBibaMiho
WWW.ACCION21.COM